

MASIMA ATIBUKILE



Mulena, Na lumela; Mulena, Na lumela,
Lika kaufela za konahala; Mulena, Na lumela.

² Halu yemeñi ona cwalo fa nako nyana mi lu inamise litoho za luna. Mulena Jesu, lwalika mwa nzila yaluna ya buikokobezo, ku tahisa ku Wena, ka kuopela cwana, kuli lwalumela. Mi lwa lapela, Mulena, kuli cwale, U kazwela pili kukomauna Sinkwa sa Bupilo ku luna, kakulufa lika ze lutokwa, kuzwa mwa Linzwi la Hao. Kakuli lwalii kupa ka Libizo la Jesu. Amen.

³ Ha mu ine. Na sepa luli, haiba lukona, hane Ni ka bulela linzwi lelituna-kaku fitisia cwale la “amen,” kuli limbuyoti ze tuna za Mulimu li suluhele fa halimu a sicaba se.

⁴ Ne ni inzi kakusasana wo ni teleza hande kwa sebelezo, ka kuikola bupaki, mwa linzila ze shutana shutana zeo mutu ni mutu nanani za kuambola. Ni kuteeleza kwa baenyi, muzwale wa kwa Baptist fa yanatilo kupa swalelo kakuba ni muhupulo omaswe. Kabakaleo Na—Na itumela luli kwa butu, yomuñwi haikokobeza luli, kapa—kapa kuishuwa luli, hape, ha hupula kuli u ezize mafosisa. Yena ha sika kupa swalelo kuna, nesi na yoo na kupa swalelo kuyena, neli ku Mulimu. Kamukwao cwalo Na—Na itumela ka seo, mwabona. Mulimu afuyole muzwale wa luna, ni muzwale wa mukutazi wa hae.

⁵ Mwai, mu Baptist yani, mwa ziba, ne Nili wa keleke ya Baptist nina kasibili. Nenili wa siemba sa Kelele ya Missionary Baptist. Hane Ni tile mwahala batu, Na ziba mo mu ikutwela. Ne ni ikutwile nto ye swana, kutala sika sesiñwi seo Ne—Ne ni sazibi.

⁶ Nahupula kukopana kwaka kwa pili haneniboni ba pentecostal, neli kwa Dowagiac, Michigan... Mu ni swalele, Ne nili kwa Dowagiac fa musipili wa ku yamba, mi nenii kuta kuzwa kwa Dowagiac, ku shetumukela kwa Indiana. Mi kacwalo Ne niboni mabizo, a “Jesu” fa limota kaufela ni zeñwi, mi Ne nikeni kwa lisebelezo za bona zazi lani. Mi habusa bani kupa kuya kwa pata, kuyo ambola manzwi nyana, mi Na eza cwalo. Mi Na... Seba nibuza kuli Ne nili wa keleke mañi, mi Na babulelela kuli Ne nili wa Baptist.

⁷ Mi busihu bwani neba nani muuna muhulu yomunsu yana izo kutaza, mi mane mwendi nazamaela mwa maeite a lilimo, mi saya kwa pata. Mucembele wa batu, neba bata kumutusa mwa kuzwela fande. Na li, naapezi iliñwi ya mikanojo yemitelele ya bakutazi, ya kola yefubelu, ni kaemba feela kaka nyinyani kabulizi bo busweu mwa matuko. Mi se Ni nahana, “Baana ba kaufela mo ni baituti, baana babatuna, cwana baka tuhelela

sebelezo ye kufiwa ku mutu ya cwalo? Kuhande, muuna muhulu nakaba mwa sipula kokuñwi, ka kuikatulusa.”

⁸ Nebanze bakutaza zazi lani ka zeo Jesu naeelize fa fa lifasi. Mi, kono yena sataha, kutoikungela toho yataba yahae, Na sepa neizwa mwa Jobo . . . :7, 20, Ha nizibi hande haiba kona Liñolo leo. Kono, kize zene iambola, kapa siemba sayona, “No li kai hane Ni toma mitomo ya lifasi, fani linaleli za kakusasa hane liopela hamoho, ni bana ba Mulimu hane bahuweleza ka tabo?” Mi aambola kazene ezelile mwa Lihalimu, kono kanti neku ambolwa zene ezahezi fa lifasi.

⁹ Mi fokuñwi, mwendi mwa mizuzu iketa lizoho hanasweli kubulela, a, Moya wa Mulena wa mu nata, mi atulela mwa halimu kuwela fa fasi ni kunata masito a hae hamoho. Mwai, ne ku nani sibaka sesituna, ne ku nani mwendi kufitelela sa kwanu kwapata; mi aya azwa kwateni, ali, “Ha muna sibaka se situna kwanu fakuli ni kutaleze.”

¹⁰ Kihande, ne Nili wa myaha ye mashumi amabeli kanako yale. Na hupula, “Haiba—haiba seo siezahala ku muuna muhulu yani, kana ikaba cwani kuna?” Cwale mwabona?

¹¹ Ka neku la kubuluka lika kaufela ka swanelo kwa mizwale yaluna ye minca, luli lwa ba amuhela mwa keleke yaluna. Na bona, Na lumela ne baambozi kaza muprisita ya inzi fa, Na sepa; kakuli, kuba mu Irish, batu baka kiba Katolika. Mi kona kuli nekusana ni babañwi hape, ba Baptist ni ba bashutana. Mwendi ne mu lyangani nyana, nako yefitile. Ni lemuhibile kuli hakuna niyomuka wa mizwale yabulezi kazateñi, kono Ni hupuzi kuli Ni like kutatulula hande. Cwale Muzwale Shakarian . . . Mwamulaho mukutazi yomunde fa hanatezi tabo, kuziba za Kutaha kwa Mulena kuli kusutelezí, na—na ambozi kuluna ka lulimi, lusili. Mi luna ni batoloki baba tolokanga. Seo, mi Liñolo lili, “Haiba ha ku na mutoloki, fo he ba kuze.” Kono haiba—haiba babulela mwa malimi mi ni ku atoloka, iba bupolofita. Konakuli ki kulyangana nyana kwa—kwa bona bababeli ka nako yeswana. Cwale, sani ne si kulyangana kokutuna, mwabona; kakuli, alimuñwi wabona nasweli kutoloka, yo muñwi na polofita. Mwabona? Kona kuli kona . . .

¹² Ne Ni hupula kuli bana ba hesu ba utwisise, haiba ne ba sika utwisia, kakuli alimuñwi wa bona nafa kaswanelo . . . Kana nemu lemuhibile fa na feleza mutu ni mutu? Mi yo muñwi na talizwe feela, iliyena, kuli Moya wa Mulimu nopolofita ku fitela kuyomuñwi; kutoloka, yo muñwi na sweli kutoloka. Kuli ku u twahale, fakuli mu . . . ha lu . . . Linako zeñwi, kwa munahano wa butu . . . Sina feela muzwale waluna yomunde yanafa buinyazo kakusasana woo. Kinto ye lyanganisa nyana ku mutu yasa utwisisi. Kono kubani babali mwahali, bakale mwa ndwa yeluli kuyona, kupalañi, lwa utwisia zani, zeo lika ze

litalusa. Kabakaleo ne Ni hupula kuli Ni ambole sesiñwi kaza teñi, haiba neli tukelo.

¹³ Cwale, Na—Na ziba se haki sibaka sa kubulelela ze cwalo. Kono bakiñisa kuli mutu ni mutu ubile abulela lika zenyinyani, Na . . . Mwa ziba, muuna yale naize, muuna muhulu yomunsu naize, “hamuna sibaka sesituna sa kuli ni kutaleze teñi.” Ha muna *nako* yeñata yakuli ni kutaze. [Puteho yanyakalala—Mu.] Kapa kuibisa butelele.

¹⁴ Muuna yomuñwi zazi leliñwi naize, nali, “Mubuleli na tile, naabile mulisana wa keleke fa lilimo ze mashumi amabeli. Mi na kutazanga hañata ka mizuzu feela ye mashumi amalaalu kakusasa ni kakusasa la Sunda mwa keleke yahae.” Mi sali, “Kakusasa wo la Sunda, u kutalize lihola zetaalu.”

¹⁵ Mi ba sikhata sa madikoni ba mu bizeza mwahali, mi bali, “Bo mulisana, luli lwa itumela ku mina.” Bali, “Lwa ziba kamita kuli—kuli mu yemela Bibele ni liswanelo za Yona.” Mi cwale se bali, “Mi kamita mwa lu sikululanga kuli lu ikutwe kupetahala ni kukena fa pila Mulimu. Mi luli lwa itumela ku mina, mi lulumela kuli umutanga wa Mulimu. Hape kaniti lu itumezi nikwa kutazo yani kakusasana woo. Kono,” bali, “kuna ni feela nto iliñwi ye lubata ku mibuza ka yona.” Bali, “Lu mi lemuhibile, sina sikhata sa madikoni.” Bali, “Sunda kaufela kakusasana mu kutazanga feela mizuzu ye mashumi amalaalu, mi kacenu neli lihola zetaalu.” Bali, “Cwale, muhupule, lwa itumela mwa maneku kaufela. Neli nto ye nde.” Kueza kuli muuna muhulu a ikutwe hande, mwa ziba.

¹⁶ Yena ali, “Kihande, mizwale, Ni kami bulelela mo ku inezi.” Ali, “Kakusasa ni kakusasa ha Ni yanga kwa . . . Ha ni biziwangka kwa katala,” ali, “Ni beanga kaemba ka switi yebizwa Life Savers mwa hanu,” a li, “mi Na ka mumunanga cwalo.” Mi ali, “Cwale kaswiti kakabizwa Life Saver haka shengunkile,” ali, “kabanga feela mizuzu yemashumi amalalu,” mi ali, “konakuli Ni tuhela kukutaza.” A li, “Mwa ziba, kakusasana woo, ne Ni hupula kuli Ni fitelezi nako. Ne nika kwile, Ne ni nani kunupo mwa hanu.” [Puteho yaseha—Mu.]

¹⁷ Na hakuna senikabeya mwateri, kamukwa ocwalo nisepa haluna likunupo mwa lipokoto za luna. Kono lu ba . . . Na sepa seo hasisika utwahala kashwau fa. Kono Ni sazo . . . Mwa ziba, niheba Mulimu unani maikuto a nyakalalo, mwa ziba.

¹⁸ Kona kuli luitumezi hahulu kuba mo nikuba ni nako yende ye ya kopano, mi—mi ni litohonolo le la ku komauna Sinkwa sa Bupilo hape, ka nzila yaka ye bunolo. Na ziba, sina baituti, sina muuna yani yazwa kwa England ha na bulela fa mabani busihu; mawi, ha ni latangi kuina kwa mulaho wa mutu ya cwalo, katuto yaka yasitopa sa-bu supa. Kono Ni sepa kuli Mulimu uka mi tolokela taluso yeli mwa pilu yaka. Mwabona? Haiba manzwi aka a si ka luka; litakazo zaka, Na—Na sepa, lilukile.

¹⁹ Cwale ha lu baleni mwa Liñolo. Buñata bwa mina mu tabelanga kulatelela. Mi Ni kabala kakusasana woo, mwa mizuzu nyana feela, kuzwa mwa Buka ya Jeremia, mupolofita, kauhanyo ya 2, mi Ni ka kala cwale ka timana ya 1.

Cwale linzwi la MULENA lata ku na, lali,

*Zamaya uhuweleze mwa lizebe za Jerusalema, uli,
Sa bulela MULENA kise uli; Na ku hupula, mukekecima
wakwa bunca bwahao, ni lilato la mulatiwa wahao, ha
uno ni latelela mwa lihalaupa, ni mwa naha yesika
limwa.*

*Isilaele neli ya kenile ku MULENA, mi neli mutamu
wa liluwo la hae: babane ba ka mu lwanisa...ni
kumufoseza; nebaka tahelwa ki bumaswe, ku bulela
MULENA.*

*Amu utwe linzwi la MULENA, Mina ba lusika lwa
Jakobo, ni mina ba ndu ya lusika lwa Isilaele:*

*Sa bulela MULENA kise uli, Ki bumaswe mañi bo
bafumani bo ndata mina kuna, ha ba zwile fa pila aka,
mi ba zamaezi za mbango, mi ba fetuhile nto ya mbango?*

*Hape haba sikali, U kai MULENA ya lu zwisize mwa
naha ya Egepita, ya lu zamaisize mwa lihalaupa, mwa
naha ye seta ni ya misima, mwa naha ye omile, ni mwa
miluti ya lifu, ni mwa naha ye sa zamaiwi ki mutu, ni...
kuyahiwa ki mutu?*

*Mi Ni mitisize mwa naha ya buiketo, kuli mucé lico za
mwateñi ni zende za mwateñi; kono ha muse mukeni,
mwa silafaza, naha yaka, buswa bwaka mubuezize nto
yemasila.*

*Mi baprista haba sikali, U kai MULENA? Ni bazamaisi
ba milao nebasika ni ziba: ni ba balisana nibona
bani fetuhezi, mi bapolofita ba polofita ka Baale, ni
kuzamaela linto zesina tuso.*

*Kabaleo Ni kana...ni mi zekisa, ku bulela MULENA, Ni
zekise ni bana ba bana bamina.*

*Kakuli...mwa lioli za Kitimi, ha mubone; ni kwa
Kedare, mi mu lemuhe hande kuli, mi mutualime haiba
taba yecwalo ika fumaneha teñi.*

*Kana naha ifetuzi balimu bayona, kanti hasi...
milimu mane? kono sicaba saka si fetuzi kanya ya sona
kwa lika ze safi mupuzo.*

*Amu komoke, Mi na mahalimu, ka se, mi musabe
hahulu, ...mui cambaele, ku bulela MULENA.*

*Kakuli sicaba saka si ezize libi zepeli; ba ni tobohile
na liweluvelu la mezi a pilisa, mi ba ikepezi masima, ili
masima atibukile, a sa buluki mezi.*

²⁰ Mulena Aekeze limbuyoti za Hae kwa palo ya Manzwi a Hae. Mi Ni tabela ku—ku nga tuto yafo, yeeli, *Masima Atibukile*.

²¹ Kakubala, Liñolo le kakusasana woo; leo, Mañolo kaufela atahile ka susumezo. Mi lutaha kwa Ndu ya Mulena kwa sikuluho ni kutwisiso. Mi fokuñwi kuli lwa bona...nto yeninyani kaufela mwa nzila.

²² Sina muuna yo wa musole, nako nyana yefitile, na luambota ni ku bulela kuli lika zeñwi, kuli mwendi mwa linaha zeñwi bana ni litobolo zeñwi, kapa—kapa zeñwi zeo bahupula, mi lu lukela kufumana sesiñwi sesifita mata asani mwa—mwa milwanelo ya busole.

²³ Kihande, taba yeswana yaya ni mwa keleke, kwa sibaka ko mutu a kutaleza, kapa ki mubuleli mwa simu. Ha bona zemu Iwanisa, ni zeñwi ze sazo tateka, kuezahala, makalelo a zona kapa sika kaufela; ki ku muuna yani, haiba ki mutanga Mulimu, kutibela taba yeo kwa hule ni mihipulo ya batu kuli babe kwa hule niyona. Mi ha lulati kuli sani siezahale, kuli lu ipumane mwa libaka zecwalo.

²⁴ Cwale, ka linako ya Jeremia fa, bupolofita bwa hae, nese ibile lilimo ze mashumi a silezi kuzwa fa lifu la—la Isaya—Isaya. Mi nebainzi lilimo ze mashumi a silezi basina mupolofita yo mutuna. Neku nani Habakuki ni babañwi bapolofita babanyinyani, kono Isaya naali mupolofita yo mutuna wa mafelelezo. Mi batu nebana ni, kayona nako ye, ne basina yana ka balukulula. Ne base ba latehile. Ibo, nebali batu ba Mulimu, neba latehezi mwa muinelo cwale o—o luba fumana ku ona, sina Jeremia hana tilo polofita ku bona. Mi Jeremia hape na...Na polofitile ba sika kena kale mwa butanga, mi ni yena akena mwa butanga nibona.

²⁵ Mi he, ku cwalo, Daniele natile mwa mulaho wa Jeremia. Mi Daniele nabulezi kuli nana ni kutwisiso, ka Mañolo, ka za lilimo ze mashumi a supile zeo neba kayoba teñi mwani.

²⁶ Kakuli, nekuna ni mupolofita yomoñwi mwahala bona, yana bata kueza coko ye, sina mwana ibeezi fa mulala wa hae, kuli neikaba nto ye nyinyani, kuli, “Mwa lilimo zepeli, kihande, Mulimu na ka batisa kaufela bona kuzwa,” kono Jeremia naa ziba shutano yeneli fateni. Mi lwaziba sene siezahalile ku mupolofita yana polofitile ka mafosisa, nashwile ona silimo sesiswana sani. Kakuli Mulimu nasike a mutuhela kupila.

²⁷ Mi cwale lwa lemuha miinelo ya batu mwa zazi lani. Cwale ha Ni tokwi kuli mutokwe kuni utwisisa (Ha—Ha nibati) mwa lika ze Ni lika kubulela fa, Mañolo nyana ni zeñozwi ze likani.

²⁸ Kale ne Ni sa ño—ñolangi Mañolo aka ni zeñwi. Kono hase Ni mano fita lilimo ze mashumi amabeli kazeketa-lizoho habeli, kihande, Ha—Ha Ni sa hupula sina sapili, kabakaleo Ni ñolangi Liñolo ni mwakuzibela, kuzwa fani, ko Ni ya. Mi kuzwa foo

linako zetuna kulapelela bakuli, ni zeñwi cwalo, mi kuzwa ni kuya, Ha nina nako luli ya kubala sina mo Ni lukela kuezeza.

²⁹ Cwale, kono mupolofita yo mutuna wa zazi le, neli Jeremia, nali yomuñwi ya swana sina Amosi ni buñata bwa bapolofita babañwi bene batile. Na filikani hana boni miinelo ya naha. Cwale ne kuna ni libaka . . .

³⁰ Linako zeñwi hamu ambola kaza naha, ikona kuhupulwa kuli ki taba yeama si—si kwata sesiñwi sa batu. Ha ki cwalo. Ki siswaniso sa na ha kaufela. Mi lu fumana, kacenu, mu—mu kwa wa swalisano yeswana kacenu sina mone kuinezi mwa mazazi a Jeremia, kuli na ha niyona, hamoho, ikeni mwa, buñata kapa bunyinya, mwa kulapela milimu; mufuta wa, Ni bulele kuli, kuya kuzwa ku Mulimu. Mi ka kueza cwalo, ibile bufokoli bwa fa katala. Kakuli, kambe katala neka ka yema ka swanelo, mi ni Linzwi la Mulimu, Mulimu nakaba mwa keleke kaufela sina Mwa zamaela mwahali kuluna mo. Kono ba keluhile kuzwa kwani. Mi yeo kona taba ye Ni—Ni bata kuambola teñi kakusasana woo. Mi he cwale lufumana kuli yani ki niti mwa lusika ni lusika.

³¹ Na sepa ne li Amosi, sina hane Ni muswanisisa fa nako nyana yefitile, kuli na ize “naasi mupolofita, niheba kuba mwana mupolofita.” Kono nabulezi, kuli, “Tau ha i bopa, kimañi yasike asaba?”

³² Mi haiba kuna ni yakile autwa tau luli haibopa mwa lihalaupa, ze zemu utwanga mwa litantwe kwanu li honanga feelsa. Kono haiba iliñwi ilila mwa lihalaupa, lika kaufela linani kuteleza. Ni bile mwa mishitu, ku yo lizuma. Yona ki mulena wa libatana, mi, tau yani ha ibopa, niheba tumbombo twa tuhela kulila, lika kaufela zakuza. Bo—bo luwawa ni—ni sitongwani sesi huwaka, ni lifolofolo zeñwi, ni ku keketeza kwa lipombwe ni linjoko, bo tumbombo, mane haukonu ku ikutwa kuli wa nahana; kono fa hulenyana tau ha ibope, ni kambombo kaufela kaka lisela kueza lilata. Mwabona, lika kaufela za musaba. Ibo, kanti kuna ni zeñiata zekona ku ibulaya, kono i zibiwa kuli ki mulena mwa hala libatana.

³³ Yena naize, “Tau ha ibopa, kimañi yasike a saba?” Na ize, “Cwale Mulimu u bulezi, kimañi ya sike a polofita?”

³⁴ Mi kona, Ni hupula, miinelo ye itamahana ni ze ezahala hape kacenu. Mulimu u bulezi. Mwabona? Mi lwabona muñolo fa limota, kabakaleo ku bunolo hahulu kupolofita ni kubona kuli lukwa mafelelezo a nako.

³⁵ Mi lu bona Mulimu, kuzwa mwa maneku kaufela a liputeho, musipili kaufela kuzwa kwa Bukatolika, kufita mwa likeleke zoote za baipanguli, za Buddha ni zeñwi cwalo, kuzwa kwa India, ni zeñwi za mifuta. Wa biza batu ba Hae hamoho, ku ba kopanya hamoho. Mi Ni—Ni tabile luli ka seo, ka kubona

lizazi le halitaha. Cwale lwa... Ki—ki lizazi lelituna, iliñwi ya matohonolo a matuna.

³⁶ Kuli, kambe Ni nani ku, kambe ne Ni kaziba lifasi lisikaba teñi kale, hane lusali mioya siemba sa Mulimu, seo luli sona, kakuli neluli ni Yena lifasi lisika tomwa kale. Kakuli, kunani feela mufuta ulimuñwi wa Bupilo Bobusafeli, mi yani ki Mulimu. Mi lu siemba sa Hae. Ne lu sikabe luziba feela ni—ni kukona kuhupula, ni ku ba mutu; kono neluli mwa mihipulo ya Hae kasene luli sona, lifasi lisikabe litomwa. Kakuli, lu liemba za Hae, sina mwanaka haali siemba sa ka, mi Na ni siemba sabo ndate, ni zeñwi cwalo. Lu bana ba bashimani ni basizana ba Mulimu, ka kuziba kwa Hae.

³⁷ Mi kwa mulaho kwani, kambe ne Ni kaziba mo Ni zibela cwale, ni kutilima fa nako kaufela ya kupila, mane Na ka ni bulelala kuli, “Ki ifi nako ye utabela kupila kuyona?” Ne nika bulela kuli ona nako yona ye, kwa bukaufi feela bwa—bwa kufela kwa litaba za lifasi, ni kutaha kwa Mubuso wa Mulimu kuli u tomiwe mwa lifasi. Ni sepa ki yona nako yende ka kufitisisa mwa masika kaufela, yona nako ye.

³⁸ Lufumana fa kuli Isilaele ufiwa mulatu ki mupolofita, fami Mulimu hana muketile ni ku muluma, neba fumanehile ni libi ze peli zetuna. Mi lubata ku ambola fa lika zepeli zani zona zene baezize. Mi, kuzwa foo, lu bata kukondisa ka zona. Cwale, neba keluhile kuzwa ku Mulimu, Liweluwel la mezi a pilisa, mi baikepela ili bona masima. Neba keluhile kuzwa kwa sika sanabafila Mulimu, mi ba ikatela ili bona lika zeñwi zeo neba ikezelize bonabañi. Mi masima a, mu lemuhe, naa nani, naa tibukile mi na a puya.

³⁹ Cwale, lisima leli tibukile halikoni ku buluka mezi. Liki puya feela. Ne ni hulezi kwa hae, mi Na ziba seo lisima lakale lili sona, ni butata bo lunani kalona.

⁴⁰ Mi lisima leli puya le ki—ki siswaniso sesinde, Na sepa, ka zazi le, kuli lika (zaluna) kaufela zeo lulikile kueza, ka kukopanya batu hamoho, kubeya sicaba hamoho, kubeya likeleke hamoho, libile kamita mwa miinelo ya minahano feela. Lu likile kupanga kuli ba Methodist kaufela babe ba Baptist, kapa kushutanisa, ni likopano ze siyani. Mi sani nesi muhupulo wa Mulimu, kuzwa sapili.

⁴¹ Mulimu unani sibaka sili siñwi feela sa makopanelo. Na bulezi mwani mwa Buka ya Exoda, kuli, “Ni ketile sibaka mo nikabeya Libizo Laka, mi sani kona feela sibaka koo Ni ka kopana ni batu.” Mi Sa keta sibaka ko akabeya Libizo la Hae. Mi koo Na beile Libizo la Hae, kona Kwana kopanezi ni Isilaele. U nani sibaka ko Akopana ni keleke ya Hae kacenu, mi Uketile Libizo lani, mane Libizo leo ki Jesu Kreste. Mi kwani kona ko Akopana ni mulumeli wa niti, haali ku Jesu Kreste. Kona koo Mulimu na ketile kubeya Libizo la Hae.

Mu li, “Libizo la Mulimu?”

⁴² Na ize, “Ne nitile ka Libizo la Ndate.” Kona kuli fani kona fana beile Mulimu Libizo la Hae, neeli ku Kreste. Mi ku Kreste kona ko lukona ku kopanela kaufela mwatasaa Mali a suluzwi, mi teñi luba ni silikani, sa niti.

⁴³ Mulimu naeelize mulelo wa Hae kwa simuluho, mwa simu ya Edeni, kwa sibaka sa Na ka kopana ni mutu, mi sani nesi ka kutwisiso ya zibo; kabe neli yona, Eva nakaba mwahala muzamao wa Hae. Kono lu ziba kuli yena ka ku amuhela zibo ya Satani, “Kaniti, Mulimu hana ku,” kono Mulimu naize Uka eza cwalo! Mi kacwalo hasamulaho A keta sibaka sa kuliululwa, mi nesili ka Mali, mi isi ka kutwisiso ya zibo.

⁴⁴ Kona kuli lunata feela mwa moyo, kono ki sibupeho sa batu seo—seo batu balika ku—ku eza cwalo. Kambe luna ni nako, ne lukaya mwa butungi bwa liemba zeñata, kono ha Ni lati kunupo yani. Kabakaleo luka lika feela kunolofaza ka moku konahalela, “masima apuya.” Mi lufumana kuli ki—ki taba ye ezahalile hape, ki sona siswaniso luli sa nako yo lupila kayona, mwa halaa kuikataza kwa luna kaufela.

⁴⁵ Mi lusa libali musebezi kaufela wa mutanga Mulimu, iliyio mane yabiza Libizo la Jesu Kreste. U lukela ku kutekiwa ka neku la kubiza Libizo la Hae ka swanelo ni ka likute. Ni mifuta ya bulumiwa bwa evangeli ye yambalakani lifasi, ni zeñwi cwalo, mwa mazazi a mafelelezo a, Na sepa, nihakuli cwalo haluna kukona kubeya batu ka pilu iliñwi konji a luka ba beya mwatasaa Mali a Jesu Kreste. Sani kona sibaka feela koo luka silelezwa.

⁴⁶ Yomunñwi nakile ani biza haki kale hahulu, kuzwa mwa buse kwa Upa, mi ali, “Muzwale Branham, Ni utwa kuli se utu tezi kwa—kwa Arizona, mi uyahile si—si baka kwani kokuna ni maipato.” Mi sina ha muziba kamo Liñusa litelanga, mi Mulena nani bulelezi zeka ezahala mwa Alaska, mane ni mo ku kabela mwa California, mi kubile feela ona cwalo. Ne ba ize, “Cwale haiba kuna ni zikinyeho, ni lika kaufela, sikai sibaka sa maipato?”

⁴⁷ Se nili, “Kuna ni sibaka silisiñwi sa masabelo se Ni ziba. Seo kiku Kreste. Kakuli kubabali ku Kreste, baka . . .” Kisona sinosi seo Ni ziba.

⁴⁸ Cwale Jeremia nabizizwe niyena, kuli, “mupolofita wa kulila.” Mi kakuli, Na sepa, sene sitisa kuli mupolofita yo alile—kulila, kanti, neli kuli yena kakuba mupolofita (mi Linzwi la Mulena litahanga ku baba cwalo) ni kubona batu ba baya ka lizo zabona, ni kuhupula kuli neba kondisa, mi ku sina nzila niyekana yakuba sikululela teñi.

⁴⁹ Kakuli, nebaya kukena mwa bukoba, kakuli luziba kuli mu kutula se mucala, haku na taba kuli ki mina bomañi, seo mulisona. Mi luna sina naha lu kutuzi . . . kapa kucala, nibulele, mi lulukela ku kutula. Ni ka ambola kamuso, Mulena asi

mutabisa, mwa musihali, fa *Butuku Bwakupепa*; mi Ni—mi Ni ngunyutile sani mwahali mwani, kuli ha lukoni kuya feela ka noto. Lu na ni kukutula selucala.

⁵⁰ Mi haiba Mulimu uka lu tuhelela kuya mutakafululele mwa kulyangana kwa Bukreste kacenu, ni kulyanganisa batu mwa lika ze-babiza kuli ki Bukreste, sina Muzwale Moore nako yeñwi ha na ize, “U ka lukela kuzusa Sodoma ni Gomora, mi akupe swalelo ka ku ba cisa.” Yeo kiniti, kakuli Mulimu kiya lukile. Mi fo mafosisa afumaneha; iba—iba ku lemalela kuluka kwa Hae mi Linzwi la Hae Lieza kuli batu ba kutule zeba cezi, mi lunani kueza cwalo.

⁵¹ Cwale mulemuhe ne ba Mu fulalezi, Sibuba sa mezi a pilisa, mi baicepela masima abona bañi.

⁵² Cwale ha ku lata kunani yomuñwi mo yasa utwisisi seo lisima lili sona. Lisima ki siliba saikatezi mutu sesinga sibaka sa liweluwelu. Ki sika seo mutu ayepile. Mi ki ba bakai ba baziba seo lisima lili sona? Kulukile. Ki hande, buñata bwa batu ba munzi woo kakusasa cwana. Konakuli ba...Na hupula lisima la kale kwa sibaka, moneli bonahalela, mi kamita ne Ni sabanga kunwa mwateñi. Neli sa—sa icepezi mutu. Mi mane hamu koni kuli sepa. Ha mu koni kusepa lisima.

⁵³ Cwale sika kaufela seo mutu apangile hañata ha ki sesinde. Kono sina feela ki—ki Mulena hana tomile nako mwa—mwa—mwa muzamao wayona, ni lifasi kupotoloha; lilimo kaufela, nako kaufela halisila, zazi ni zazi, hola ni hola, ni lizazi kulikela, mi ha lipalelwı. Kono liwaci zona luli zelu kona kuba nizona, lika sialela ka mizuzu yemiñata mwa kweli fa linako luli, hakuna mukwa. Kono, hamu bone, kaufela Mulimu za eza lipetehile, mi seo mutu aeza ha si sika petahala. Kabakaleo kiñi ha mu amuhela seo mutu aeza, kanti ze petehile linze lilitenzi?

⁵⁴ Ni bile ni ambolanga kamita ka luna batu ba Pentecostal. Mwabona, lwa ziba, mi halu—halu sika zwa hahulu mwa nzila, ya Mulimu, halu lumeli; kono hape luziba kuli mwahala luna kuna ni batu ba balika kulikanyisa babanñwi. Kona mutu mwainezi. Baka lika kueza cwalo. Neba ezize cwalo mwa Bibele, “Yomuñwi, ‘Ni wa Paulusi,’ ‘Ni wa Silasi,’” ni zeñwi cwalo. Kono, bona, neba lika kulikanyisa seo mutu yomuñwi naeza kapa asweli kueza.

⁵⁵ Kono ki kabakalañi ha muka amuhela malikanyiso a buhata, ibo mahalimu atezi taba ya niti, kanti “sepiso i ku mina ni kwa bana bamina”? Kiñi ha ne luka amuhela sika sesishutana? Kikabakalañi hane luka ipangela tuto kapa tumelo, ibo Bibele ki Linzwi la Mulimu lelisika zwakiwa? Kikabakañi hane luka lika ku ekeza kamba ku zusa kwateñi, kanti Mulena Jesu na bulezi mwa Sinulo 22:18, “Yo kaufela yaka zusa Kwateñi Linzwi liliñwi, kamba kuekeza linzwi ku Lona, siemba sa hae sika zusiwa mwa Buka ya Bupilo”?

⁵⁶ Mulimu ha na tomile lusika lwa batu pili fa lifasi, Na ba bulelezi kuli bapile ka Linzwi la Hae. Cwale Linzwi la Mulimu liswana sina liwenge, muisiwa kwa lihele ki Lona; mi liwenge lateñi litile fa sibaka fo ku bunolo, mi Mulimu ubata kuli lu buluke Linzwi la Yona kaufela. Cwale ani neli makalelo a Bibebe; ka kuloba feela Linzwi lili liñwi, ku totobelize lusika lwa batu mwa lififi la lifu.

⁵⁷ Jesu natile mwahala Bibebe, mi Na bulezzi kuli, “Mutu ha na kupila buhobe feela, kono ni ka Linzwi kaufela.” Isiñi siemba feela sa Linzwi, kamba mashumi aketalizoho ka amane nitotu ketalizoho-katotune kuzwa kwa mwanda; kono Linzwi kaufela, sina feela Eva ni Adama mone bainezi.

⁵⁸ Mi kwa mafelezo a Bibebe, Sinulo 22:18, Na bulezzi kuli, “Yo kaufela ya ka zusa Linzwi lililiñwi ku zwa Mo, kapa kuekeza linzwi ku Yona!”

⁵⁹ Kona kuli kikabakalañi halu lukela kuecomeka mihupulo ya yo muñwi Mo, ibo kanti wo kona Muhupulo wa Mulimu kaza Teñi? Lu bata kunga sa Na bulezzi. Mi hape kuñozwi, “Manzwi a mutu kaufela abe lishano, mi Aka abe a Niti.”

⁶⁰ Yani kona taba yeneli ni mupolofita yo. Mwa mazazi a Jeremia, na li mupolofita, naana ni Linzwi la Mulena. Mi mutangana yo nalika kubea zeñwi ku Lona, cwale hali koni ku sepiwa. Cwale Ni lika ku swanisisa masima aa kwa milao yelu likile kuikungela, niku nga sibaka sa Linzwi lapili la Mulimu.

⁶¹ Kakuli, hakuna sesi lukela kunga sibaka sa Lona. Lona ki Mulimu. “Kwa simuluhu nekuna ni Linzwi, mi Linzwi naali ku Mulimu, mi Linzwi neli Mulimu. Mi Linzwi la eزوا nama mi lato yaha mwala luna.” Mwa Maheberu 13:8, ili, “Kiya swana mabani, kacenu, ni kuyakuile.” Lu ka mata cwani kuzwa ku Sani? Si lukela kuba Niti. Yena usiala ya swana. Waswana mwa litaba kaufela.

⁶² Kilona libaka lemu ikolela Lona, mina ba Baptist niba Methodist, niba Katolika ni Presbyterian, ni zeñwi cwalo, muikole Siemo seo. Neku leliñwi, ku mina, mu amuhezi Mulimu. Hakulata kanako yeñwi kika nzila ya minahano, mwendi mu ikutwezi Mata a Mulimu, mi umutanga wa Mulimu; kono ha use utile luli ku Mulimu, ni kulemuha sibaka sa hao ku Yena, sina mwana wa mushimani kapa wa musizana wa Mulimu, sani kona sesitisa nyakalalo tuna ku wena, yeo Mulimu na lakaza kuli ube ni yona.

⁶³ Cwale lulemuha ku Muñoli Mareka, kauhanyo yabu 16, Jesu nasika bulela kuli, “Muye mwa lifasi kaufela, mi—mi—mi mulute.” Na ize, “Muye mu kutaze Evangelii.” Mulse Evangelii, ki, ku bonahalisa Mata a Moya o Kenile! “Muye mwa lifasi kaufela, mi mubonahalise Mata a Moya o Kenile.”

⁶⁴ Neni ikambota ni muzwale, alimuñwi wa bayemeli ba... mikopano yaka kwa India, mwa Bombay kwani, ku shetumuka

mwa South Africa ni libaka ze shutana, koo ba hasanyi ba linzwi ba Li lutile ka linzwi kamba ka mihipulo. Kono zazi leliñwi mwa mukopano, Moya o Kenile hane utulukile, Yena luli, ni ku to pilisa likiti ze mashumi amalaalu kwa memo yabona yabene baapezi likubo, nifona fa sibaka fone bayemi. Basali bali kuyena mwale, bene bali mapunu sina buñata bwa bona mone bainezi cwalo haba taha mwa lifasi, mi kaona muzuzu luli o nebato nanula mazoho kuamuhela Kreste . . .

⁶⁵ Mi Moya o Kenile wa wela fa sibaka ni kuto folisa batu babaeza likiti ze mashumi amabeli ka zeketalizoho kanako iliñwi, ku nanuha mwa lipula za mawili, fa tumbeta ni lisipi. Muyemeli wa tolopo nani bizize, habusa, kubona feela limota ze longile halishetumuka mwa mikwakwa.

⁶⁶ Basali bani bali kuyema fale, mapunu, ba sa zibi kuli nebalii mapunu. Kono ona fani Moya o Kenile hauto basululela, bato puta mazoho abona kusaba kuzwa fa pila baana ba bona.

⁶⁷ Mi Na komoka kuli kamo luna mwa America luipiza naha ya Sikreste, mi ni fa Pila Mulimu; mi mwaha ni mwaha Iwa, basali bakwanu, ba itubula hahulu. Mi kanti mu lukela ku apalanga ka swanelo. Mi kamo muapalela Kreste ka buñata, kona mo mukabela ni lizwalo kuama ka buino bwa mina. Fokuñwi ha Ni bona batu moba evezanga fa mikwakwa, Ni komokanga hahulu kuli haiba luli booko buketile. Kubonahala nge kuli haba lemuhangi haba eza cwalo, se ba sweli kueza, baikeza kuba siteo sa diabulosi, ni ku luma mioya kwa lihele. Yeo ki niti. Kono lifasi kale libola sina mone libezi mwa mazazi a Jeremia.

⁶⁸ Cwale halu kuteñi kwa lisima. Cwale, lisima le halikoni kusepiwa kakuli halikoni kuitalisa mezi alona. Mi li itingile fa mezi a pula kuli litale, pula ya kamita kapa ancafazo yafa sibaka, kuba ni ancafazo yenyinyani *fa* ni ancafazo yenyinyani *fani*, kamba ze cwalo, fakuli litale. Kabakaleo halikoni kusepiwa. Halikoni kuitaza ililona. Halina amañata, alona liñi. Halikoni ku afumana. Mi lina ni kuitinga fa pula, kuli litale.

⁶⁹ Cwale halu lemuheñi koo li—li zusa pula, kolingga mezi alona, lona lisima. Azwanga fa lituwa za mashete, litebule, koo maluli kaufela afukuzwa fahalimu fani, atapiswa mwa pula, mi ashetumukela mwa lisima, liweluwelu la ipangezi-mutu. Mane likona kuba sina kasa. Mi litapisa mashete kaufela ko lifolofolo, ni miunko yamwa patelo, ni zeñwi cwalo, mi zashekela. Mi cwale moyo ufukisa li—li luli ni masila fa shishete, mi mezi cwale ataha kuto kukiseza, pula, mwateni.

⁷⁰ Mi cwale mezi akukela mwa mikoko-lombwa ni mwa sikungu, kukena mwa lisima leo mutu aice-pezi. Mi cwale amano fita kwani, satezi masila, amasila luli kuli konji mube ni kasila kakuhamulisa masila, kusicwalo hamukoni ku anwa. Cwale, mwabona, atapisize situwa, afita mwa sikungu sa mutu, mi ni mwa mikoko-lombwa ya yepile, liyosululela mwa lisima la

mutu. Mi cwale kwapeswa sefa yai-pangezi fa halimu yalona, kakubona kuli liñanya ni zeñwi litokwe kukena.

⁷¹ Cwale, cwale lulemuha kuli, mwa mazazi nyana a hasa mulaho mezi amano shekela, mwa kopa-...ya-mutu ye, kapa lisima. Muni swalele. Muni swalele. Ku lukile. Hasamulaho wa—hasamulaho wa kutapiswa, mwa mifuta kaufela ya lituto ni lika hase likukezi mwateñi; cwale lu fumana kuli, ha li se liinzi mwani fa mazazi nyana, ainelela ku shekela.

⁷² Mi mutu kaufela waziba, mwahala litaba za kale za keleke, Mulimu haluma sika sesiñwi, liñusa, mi liba lelinca kuzwa ku Mulimu, mi hasamulaho wa—wa bupilo bwa mutateki yani (kapa yo kaufela akonakuba yena, mu mubiza kuli ki mukondisi, kamba seo kaufela mubata kubulela ka yena), hasamulaho wakushwa kwa hae, baikungela mulao waku ikupulela mi bapanga katengo. Mi bamano panga katengo ka sani, kashwela ona fani. Ha kana kuzuha hape. Kaezize cwalo nako ni nako, kwamulaho, mutatube za kale.

⁷³ Kakufa likute ku muprista wa Katolika yo yainzi fa; Mulimu hana ongaongile keleke...kapa, isi ku iongaonga, Mulimu asikabe aongaonga keleke. Hayo mwa mufuta wa musebezi o cwalo. Yena umwa ku pepwa, isiñi katengo, konakuli Mulimu hana kalisize keleke kwani fa Lizazi la Pentekota. Mi cwale mafelelezo ni kwa Nicaea, Rome, ba i ongaonga, mi kwani kona kone ilatehisize Mata ayona.

⁷⁴ Mi cwale lwa shetumuka kutaha kwa litukiso za ba Lutheran, mi nali nto yetuna. Mi Linzwi la Mulimu ne li filwe, “Ba ba lukile baka pila ka tumelo.” Mi neba pilile, bakeñisa kuli ba nanuhe, ba kamuhe, kaufela bona hamoho mi bazwelepili, bona bato panga keleke ya Lutheran, ku ikambusa ilibona kwa sikwata se, mi yatoshwa.

⁷⁵ Mi Mulimu atisa John Wesley, ka kukenisiwa, liñusa la musebezi wa bubeli wa muhau, mi neli taba yende. Kono hasa mulaho wa Wesley ni Asbury, baikonga konga, se ishwa.

⁷⁶ Cwale hasamulaho se kutaha ma Pentecostal ni ku kutisezwu kwa limpo. Nebasweli kukondisa, kisika mañi sesito ezahala? Ba to ikongaonga mi seitoshwa. Hona cwalo.

⁷⁷ Cwale mwahala ze kaufela, Mulimu u sa biza babasiyezi kuli bazwe mwahala masika ale kaufela. Kaniti waeza cwalo. Mi ki nako ya luna ya kuzwa, mwa kukopana hamoho. Mi sani kona se Ni hupula, Baana ba Pisinisi Ya Evangeli ba ezize musebezi omutuna wa kuwisaka mamota a, mi babulela kuli, “Ha ku na shutano ku luna. Halu taheñi hamoho mi lu lumbeke Mulimu mwataswa mulao ulimuñwi, isiñi mwataswa katengo.” Kambe ne li katengo, kambe Ni zwile kale fa katala fa. Ha nina sa kueza ni katengo.

⁷⁸ Mo kulukela kubela, ilukela kuba puteho, isini puteho ya milao yemiñwi. Kono puteho ku Kreste, ka mata a zuho ya Hae, seo kona sika sesitisa Bupilo. Sitahisa ku pepwa.

⁷⁹ Mi kupepwa kusika taha kale, luziba kuli ku lukela kuba lifu ku si ka ba kale kupepwa. Mi ku pepwa ki ndwa, ha Ni nataba kapa ki mufuta mañi wa kupepwa. Haiba ki mwa lipepelo la likulube, kapa—kapa sikamañi kaufela, ki ndwa. Mi kucwalo ni Kupepwa kokunca, ku mi panga kuli mueze lika ze mu sa hupuli kuli nemukalieza. Kono hamu itukisize kushwa kwa neku la mina bañi, fohe ke mu pepwa sinca, sibupiwa se sinca ku Kreste Jesu, cwale lika, za ikwaluhela mi bupilo buba pata yenca ku mina, kakuli muamuhezi Mutu wa Jesu Kreste, mi isi lituto zeñwi kamba tumelo isili.

⁸⁰ Kamba, niheba kwa Linzwi leli ñozwi, Li lukela kufiwa mata ki Moya o Kenile. Hakuna taba buñata bwa lituto zo nani, li wezi fa ni lishwile. Na kona kuba ni buloto kutaza lizoho; kono ha busai mwa litukiso za kufiwa bupilo, buloto ha buna kupila. Mi wakona ku ba ni degree yabu doctor, Ph., LL., se u itakaleza kamukana; kono kwanda kuli Moya o Kenile utahe fani ni kufa mata kuwena, kakuba zibo ya hao kaza Mulimu, fohe buloto habuna bunde. Ku ituta kwa hao ki kwa mbango.

⁸¹ Sina muuna wa Mungalande hana kile abulela busihu bobuñwi fa, ne Ni komokile hahulu ka sani. Kuituta kaufela kwana nani, sina Paulusi, nana ni kulibala kaufela zana zibile, ilikuli a fumane Kreste, kueza lika za nasa hupuli ku eza.

⁸² Kono yani kona nzila mo Mulimu aezezanga, Wa lu kokobezanga mwa nzila ya kuituta kwa luna. Ha ki kuli Ni lika kuyemela butimbi, kono Ni lika kumi bulelela shutano. Tuto haikoni ku tisa Bupilo. Kunga Moya wa Mulimu kutisa Bupilo, mi Bupilo bo ha bu lukeli kuzwa mwa ancafazo ya kuihanela feela. Bu lukela kuzwa mwa Bibele, ancafazo ya Linzwi, mi Linzwi lani kile liswana maabani, kacenu, ni kuyakuile. Mi ha Li wa kacenu, ni kufa bupilo, mu fumana linepo ze swana zemu fumana mwa Likezo 2. Kaniti. Ku cwalo kamita, mi ku kabanga cwalo kamita, kakuli ki Moya wa Mulimu o zamaisa miinelo.

⁸³ Ki miinelo ye panganga lika. Leo kona libaka mina baana hamu lutiwa kuli, "Mutisange bana bamina kwanu." Kihande, kaniti sani silukile. Ne nitabezi kubona mwanaka wa musizana, Rebekah, ha kena ni kuina, mizuzu nyana ye fitile. Mina ba bañwi muniboni hane ni ikinamela ku musali, neli mwanaka wamusizana, cwale nakedi mi saina. Ni bata kuli aamuhele kolobezo ya Moya, mi ki kabakaleo winzi mwa mukopano wo. Sani kona mulelo wa teñi. Si lwala muinelo.

⁸⁴ Sina muuna muhulu Doctor Bosworth hana bulelanga kuli, "Mwakona kuunga lii la kuhu niku libeya foilobezi nja, lika ndondola kuhu." Kabakalañi? Kakuli ki lii mi lifumani mufutumala wo lukela.

⁸⁵ Ha nina taba kamba uwa Methodist, Baptist, Presbyterian; mwa susumezo ye lukile, u ka pepwa mwana yomunca wa Mulimu. Muinelo ko na wo beleka, hakuna taba situlo sonani mwa kopano.

⁸⁶ Neni lisanga likomu. Ne nilemuhangha mulisana hane luliisanga mwa mushitu, kuzwa mwa—mwa mafulisezo a kwa milaka, ni ku likenya mwa mushitu. Na yemanga fani ni ku libuha hane lizwanga mwa munyako, ili kwa mulaka. Na sa talimangi hahulu fa mifuta yeminde, kakuli ne ku nani mifuta kaufela ye ne kenanga mwani. Kono ne ku nani taba ilīñwi yana lemuhile, mufuta wa mali. Ne ilukela ku ba peu luli ya Hereford kusicwalo neisa lumelezwi kukena mushitu wale, kakuli kiba katengo ka Hereford Association bane ba fuliseza mwa mushitu wani. I lukela ku zibahala ka mali, kuli peu i bulukiwe hande.

⁸⁷ Mi Ni hupula kuli cwalo kona mo ku kabela fa Lizazi la Katulo. Haana ku ni buza kuli ne Nili wa Methodist, Baptist, Pentecostal, kapa Presbyterian, kono U katalima fa zibahazo ya Mali. “Ha Ni bona Mali Ni ka kufitelela.” Yeo kona taba.

⁸⁸ Konakuli lufumana kuli masima a, amano ina fa nako nyena, a ba... a zamaisi mezi mi asana bunde. Mi aba cwale, hape, iba mandu a limbotwe ni mikolozwani ni linoha ni liñanya ni likokwani za matuku, ni zecwalo, kakuli seli buino bwa nambwanyaleka bo buse bukeni teñi. Ha mu nahane, kutapisa situwa sa sishete, kamba kuzwa fa situwa sa ndu bukaufi ni sishete, kamba koo kaufela masila afumaneha, ki mufuta mañi wa liñanya ni likokwani ze nyinyani, mi kaufela, ze yo felela mwa lisima le?

⁸⁹ Cwale, ki mutala omunde wa mufuta kaufela wa mulao wai-pangela mutu. Yena ki mufokoli, ka kukala. Kona libaka atokwela Mupulusi. Na sike aipilisa ili yena, ha kuna sakona kueza kazateni. Kiya latehile, sa makalelo. Yena upepezwi mwa lifasi, atezi sibi, utaha mwa lifasi anza bulela buhata. Ki li hata, sa pili, kabaka leo mwa lifasi ukona cwañi ku ikezeza nto ifi kapa ifi iliyena? Mutu yakenile ukona cwañi?

⁹⁰ Hakuna mutu yakenile. Hakuna keleke ye kenile. Ki Moya o Kenile! Isiñi keleke ye kenile, batu baba kenile; ki Moya o Kenile mwahala batu, kona seo sili sona. Amen. Haki lilundu leli kenile fani Pitrosi ni bani fone bayemi; lilundu ne lisika kena. Kono ki Mulimu ya kenile, fa lilundu, yana li kenisize. Haki mutu yakenile; ki Moya o Kenile oitusisa ku mutu yale, sesi mupanga kukena. Ha ki mutu; kono ki Butu wa Moya o Kenile! Ha ki mutu; kakuli, yena ki mutu feela, “yapepezwi mwa sibi, abupilwe mwa bumaswe, utaha mwa lifasi inza bulela buhata.”

⁹¹ Mulao kaufela wai-pangezi mutu ukamubeya ona mwani; uka fofazwa ku za minahano, meto a butu, zeo ahupula kuli, “Ni fumaneha kwa keleke, libizo laka li mwa buka. Ni ezi ze se. Bondate neeli bo *ngete*, ni zeñwi cwalo.” Seo sa utwahala hande;

kaniti, ku cwalo, kokutokwa ni nyazo fa teñi. Kono nihakuba cwalo, mulikani, Jesu naize, "Kwanda kuli mutu apepwe sinca, hakoni neba ku bona," *kubona*, koo, ha ku talusi kuli ubona ka meto ahae, kono, "kuutwisisa Mubuso wa Lihalimu." Konji hausopepilwe mwateñi!

⁹² Yo mukutazi wa Baptist, ku konahala cwañi kuli muuna yani yana yemi fani anza keshebisa ni kusoma taba Ye? Mwabona, hakuna ni sesikana kuyena sesikona ku Li amuhela; kono Mulimu na ezize, mwabona. Mulimu na mufile Moya o Kenile. Na bonahalisize kuli se nesi buipi, le ki Linzwi. Yena u liutwa feela kuzwa kwa muhupulo wa sikolo, mi balika kunga kaufela li—li mbuyoti za Mulimu mi balitoma fa lizazi la kwamulaho.

⁹³ Mukutazi yo munyinyani wa Baptist, kwanu haki kale hahulu, yainzi ona mo kakusasana wo; mi natile ku na, ni kubulela kuli, "Muzwale Branham, kuna ni taba yosweli kueza yefosahalile."

Se nili, "Ni tuse."

⁹⁴ Mi yena ali, "Wena u, Na sepa unani niti mi umutu yomunde, kono . . ."

Se nili, "Naitumela, sha."

Sa li, "Kono kuna ni nto iliñwi yoeza kamafosisa."

Se nili, "Ni sepa Mulena ufumani feela nto iliñwi ye fosahalile."

⁹⁵ Mi a li, "Kihande, kuna ni . . . Kiye taba yo eza ye fosahala." Sali, "U lika kubulela lifasi kaza bulumiwa bwa ba apositola, mi," ali, "bulumiwa bwa ba apositola ne bufelile niba apositola."

⁹⁶ Se nili, "Sina mu Baptist ku wa Baptist, Ni tabela kukubuza puzo."

Ali, "Sikamañi?"

⁹⁷ Se nili, "Kikuli walumela Linzwi la Mulimu kuli li susumelizwe, kaufela mwa buino bwa lona?"

Sa li, "Kupalañi, nalumela."

⁹⁸ Se nili, "Konakuli, Na ize, 'Usike wa ekeza linzwi, kamba kuzuza Leliñwi.' Kakuli," Se nili cwale, "Ni ka kubonisa koo Mbuyoti ya buapositola itaha fa batu, ka sepiso ya Mulimu, cwale unibonise sepiso ya Mulimu ni fone izusizwe kwa batu. Mwabona, haiba haukoni kuzusa seo mwa Linzwi, fo—fo he ulibale ka zateñi, mwabona," Se nili, "kakuli I sa zwelapili."

⁹⁹ Neku sina sana bulezi fa mizuzu nyana. Mi kacwalo se Nili, "Kuhande, kanti, muzwale, Ni tabela ku kubuza se. Pitrosi yana kalisize bulumiwa bwa baapositola, ka Zazi la Pentecost. Mi kamukana luziba kuli ki niti, kakuli na na ni linotolo za Mubuso, zeo Jesu na mufile. Mi cwale ha mu lemuhe sa nabulezi. Na ize, 'Mubake, mañi ni mañi wamina, mi mu kolobezwe ka Libizo la Jesu Kreste kwa swalelo ya libi, mi mu ka amuhela mpo ya Moya

o Kenile. Kakuli sepiso ikumina, ni kwa bana ba mina, ni ba ba kwa hule, mane ni ba bañwi bao Mulena Mulimu aka biza.’ Mi cwale haiba kuna ni sibaka Fa na izusize, kona kuli ki sikamañi sene si ezahalile kwa manzwi a Pitrosi ka Zazi la Pentekota?” Mwabona? Batili, aisikafela shangwe!

Ngunyana ye Latiwa, Mali a Hao amande
Ha a na kufela Maata,
Konji Keleke ye liuluzwi ya Mulimu
Haita piliswa, kakusa eza sibi hape.

Cwale mwa pina, yende yemunati,
Ni taopela Mata a Hao a kupilisa,
Fo lulimi lo, lwa si ku kuma
Ha luta ku za mwa libita.

¹⁰⁰ Mulimu ni tuse kulumela Sani ni kuswalelela Teñi, mi kaufela luna, luyemele Sona, kakuli Ki Niti ya Evangeli! Eeni, sha.

¹⁰¹ Mutu ya butali halukeli kutalima fa lika ze. Mi uziba kuli alikonni kubeleka. Alisika beleka ni haisali. Bulapeli bwa kuongaonga ni zibo ya kuipangela ali koni kubeleka fa Pila Mulimu. I lukela ku taha, isika zwakiwa, kuzwa ku Mulimu. Ha isikabe itusiswa ki Mulimu, ha ku sikaba kale ni kwa mulaho foo Mulimu aitusisize nzila ye cwalo. Cwale mina, oh, muikungela mamembala ni lika ze cwalo. Kono Ni talusa peu ya niti ya Mulimu, Mbuyoti yeswana ni yene wile ka Zazi la Pentecost, ha litahangi kufitela mwa katengo; itaha ka kupepwa, kupepwa sincia.

¹⁰² Lwa memiwa kuunga Isilaele kuba—kuba mutala, o ba bile ona. Amulemuhe, “Bamu tokolomohile ku Musiya, liweluwelu le baipumanezi, ni ku icepela masima abona.” Muhupule ta—ta—ta—taba, mutu hali fa lisima leli welauka, inze anwa, mi kuzwa foo ubata kuipangela lisima, mwabona, kuli anwe kulona? Cwale saani kona sana bulezzi mupolofita, kona seo Linzwi la Mulimu neli bulezi. Kona seo Mulimu na bulezi mupolofita. “Mu Ni keluhile mi—mi mu Ni tobohile, sibuba sa mezi a pilä; mi muikepezi ili mina masima, ana ni maandala, mi apuya.”

¹⁰³ Mwabona, taba, ne ba bata sika sene bakona kuzamaisa, kamba ku bonisa sene baezize. Kona ku—ku lyangana kwa bulapeli bwa kuikupulela. Nako kaufela ki kulika, ba na ni kuipangela sika mwahala abona bañi. Ba na ni kuba ni milao yeo kaufela ni tutengo, ni lika, “Mi fa Se nili wa *kwa* cwale.” Bakeñisa ku ba feela bana ba Mulimu baba ishuwile, ba bata sika se ba ka iponisa kasona. Bakeñisa kuli ba tuhele Mulimu aeze ka nzila ya Hae, ba batile ku eza kanzila ya bona. Mi cwalo kona moo milao ingezi likeleke kacenu. Isiñi . . . Mulao ni mulao, yo ubata kanzila *ye*, yani ubata mwa nzila *yani*. Haiba mu ba Methodist, mulukela kuba mwa nzila *ye*. Wa Baptist, nzila *ye*. Wa

Presbyterian, Katolika, ni bao kaufela, ba na ni milao yabona. Hani Iwanisi sani, kono saani hakona se Ni ambola fateni.

¹⁰⁴ Mutu ubata nzila ya hae mwa ka ezeza, ni Mulimu u na ni nzila ya Hae mwa ku ezeza lika. Mi Na ize, “Mu swalelela kwa nzila ya mina, ki lisima leli tibukile; mi amulati ku amuhela nzila Yaka, yona nzila ya Bupilo.”

¹⁰⁵ Mi saani ki nto ye swana ni mo kuinezi kacenu. Hakuna zeshutani ni hanyinyani. Mu nahane bukuba bwa mutu yasiya sibuba sesi welauka sa mezi a kenile asweli kushelauka, mi ubata kuya kwa lisima leli tibukile la icepezi ili yena, mi ai katela lisima, leli na ni masila azwelela fa situwa sa sishete a suluhela mwateñi, mi koona mwa nwa. Kaniti kunani sesi fosahalile mwa booko bwa mutu yoo.

¹⁰⁶ Mi mutu haka kumalela kwa mu—mu mutomo wa Mañolo, mwa sibaka sa ku amuhela Moya o Kenile opaka Mañolo ni ku A eza a niti kumina, ku na ni sesi fosahalile mwa moya wa mutu yoo. Yani ki niti luli. Faa, Moya o Kenile! Mañi ni mañi u nani mwa tolokela Bibele ya hae, mo mu hupulela kuli kulukile. Mulimu hatokwi lituso za mina. Mulimu hatokwi ku toloka kwa mina.

¹⁰⁷ Mulimu ki Mutoloki ili Yena. Mulimu wa tolokanga ka nzila Ya—ka nzila Ya bulela kuli U kaeza. Yena Mulena kwa simuluho nabulezi kuli, “ha ku be liseli,” mi sekuba liseli. Saani hasi tokwi kusitoloka nihanyinyani. Seo kona sana ezize Mulimu. Na ize “mwalyanjo ukaba fa mezi amanca,” natilo itwala. Saani hasi tokwi kusitoloka nihanyinyani. Na bulezi kuli U ka “sulula Moya wa Hae fahalimu asicaba kaufela,” Na ezize. Ha kutokwi toloko niyekana. Mulimu wa itolokelanga Linzwi la Hae ili Yena niku Li zibahalisa, niku Libonahalisa, niku Linyakisisa.

¹⁰⁸ Kona moo mupolofita nanyakisezwa kuli ki wa Mulimu. Na ize, “Haiba kuna ni alimuñwi mwahala mina, yana ni moya kamba ki mupolofita, Na Mulena ni ka Itibahaza kuyena ka lipono, ni ambole kuyena mwa litolo. Mi sabulela hasiezala, foo he mu musabe; kono haiba hasiezahali, musi musabi.”

¹⁰⁹ Yani kinto ye swana Mulimu habulela Linzwi la Hae, mi cwale mutu uli, “Cwale Linzwi ki Le,” mi ku ezahala ona cwalo, kona kuli foo ki Mulimu yaeza zeo.

¹¹⁰ Kono haiba uli, “Ki ka nzila ye, mi mazazi sa fitile,” kikabakalañi asika nga li . . . U bata feela sinkwa, mwa lizoho la hae, kwa bana, ni kuba amuha sona; mi bona banze balapa. Kiñi ha mu bata kunwa mwa lisima kanti liweluwelu kile liteni?

¹¹¹ Sibuba sa Bupilo kinto mañi cwale? Sibuba sa Bupilo ki si kamañi, sibuba sa Mezi a pila? Sibuba sesi welaukela kwande, lu ka swanisa ku Sona.

¹¹² Cwale Ni bata kuli mulemuhe shutano mwahala lisima ni sibuba sa mezi apila; sibuba sesiwelauka, ni lisima la kale

leli tibukile kwani lelitezi liñanya, mikolozwani, limbotwe, likokwani, likamañi kaufela, mwabona.

¹¹³ Mi kise sibuba sesi welauka. Cwale mulemuhe se. Sona sa-ikuliseza. Ha mu lukeli kunga milao ye mituna nikutisa masheleni ku lona. Ha mu tokwi ku kopanyanga liemba zeñata kulona. Lona labonela ba siemba salona, ba ba nani Bupilo bwa Moya ku bona, labeleka.

¹¹⁴ Mulemuhe mezi azwa ku lona, amanca, amasweu mi akenile. Isi lisima, leli inelezi leli ñozwi ka minahano ye mashumi amane, mihupulo ye mashumi aketalizoho yeshtana, bali, “Se si lukile, mi *saani* si lukile, ni muhupulo *woo*,” mi baketa ni ku babiza, mi hanze ba eza, ni kupanga kopano kuzwa mwateni. Ki le lisweu mi likenile, Linzwi la Mulimu lelisika zwakiwa, lelizwa mwa lizoho la Mulimu. Ki sibuba sesi welauka sa niti.

¹¹⁵ Hamulemuhe, kunutu ya mata alona ikulona liñi. Mutu hakoni ku ifumana. Konji ka ku lwanisa, mwa tasi alona, kona zetisa kuli likasheze mwa halimu.

¹¹⁶ Na hupula hane Nisa, eza nga, hane nili mubabaleli wa lifolofolo mwa Indiana. Ne ni yanga ka, mwa Harrison County, lisima leliñwi, ka maliha. Ne liwelauka nako kaufela. Mi kusa, oh, ne li bonahala kuba nto yetabile hahulu. Kapa litwaa niha nelibanga teni, kukangela, mezi akangezi, mwa na batela luli, ne linze likashaka; koo masima akui-cepela ni mingomo, nelitezi fela mambotwe ni lika kaufela, nelili kwani zali kuoma, likangezi.

¹¹⁷ Mi saani si bonisa kuli kopano kaufela, ha itokwile Moya kamba kutaha cinceho ya susumelezo, ika kangela. Kono liweluwelu la Mulimu, Ki ya—Ki ya swana mabani, kacenu, ni kuyakuile, li shelaukisa lika kaufela kuzwa ku lona ni ku linepela kwande. Mi hakuna ni sesikana mwani, ka ku kala. Nako ye si wela mwateñi, lika si kasheza kwande.

¹¹⁸ Sika sani nesinze si shelauka cwalo, mi se Nili, se niina faani zazi leliñwi, Neni tohupula kuli, “Na sepa Ni ka ambola ni sibuba saani, fa nako nyana feela.” Seni tubula kuwani yaka, mi Na li, “Ki sikamañi sotabezi cwana? Kiñi so welaukela cwana? Mwendi ki kuli liputi linwa hahulu ku wena, faa ni fa.”

Kambe ne likona kubulela, nelika alaba kuli, “Batili.”

Se nili, “Mwendi kakuli Ni nwa ku wena.”

“Kutokwa, ha ku cwalo.”

¹¹⁹ Se nili, “Kuhande, ki sikamañi sesi kukenisa, cwana hande? Kabakaleo ki sikamañi—sikamañi sesi shelauka, sesi kushelaukisa, u tezi tabo nako kaufela, mi hakuna sesi ku kangelisa? U shelaukiseza mwa moya, mi hakuna se siñwi; mezi a kenile.”

¹²⁰ Kambe ne likabulela kuna, mwa ziba seo liweluwelu lani ne lika ambola? Ne li kali, “Muzwale Branham, ha kina yasweli

kushelauka, ki sesiñwi mwa mulaho waka, sesi shelauka.” Mi cwalo kona mo kuinezi. Lani ki linzwi lelisina bunde, kono mwa ziba se Ni talusa.

¹²¹ Mi konna mo kuinezi ka maikuto a kupepwa-sinca. Hamu koni kuba niona. Ki—ki lisima leli welauka mwahala mina, leli shelauka mwahalimu ka Bupilo bobu safeli. Mwabona, ku nani sesiñwi kalona, semu sa tokwi kueza sesiñwi ka lona. Mingomo yai-pangezi mutu ya kona kukangela, ni baani baba kupa lincafazo ni lika kaufela; kono mutu yainzi mwatasa Sibuba sani, yapila mwa Sibuba sani, ki musihali ni busihu! Batili, ha mu lukeli kulitela pula haisehula ni liancafazo zeñwi. Mu nani zeñata za Lona. “Ni ka mufa liweluwelu la Bupilo, mwahali kuyena, neli shelauka.” Ku nani sesiñwi mwahali a Lona, sesinca zazi ni zazi, se sisweu mi sikenile. Ki Linzwi la Mulimu lelisika zwakiwa mwa pilu ya mina ni mwa mulomo, liponahaza ili Lona, laipulela kaza Lona. Ha nina taba kamba yanela, kamba kuna ni mbundu, mufuta kaufela oli pazuzi kaona, musali ba ba tabile kakuli Moya o Kenile umwahali mwani inze uwelauka. Ki Maata aipatile. Mulemuhe. Oh, kunutu ya lona imwahali a lona.

¹²² La ipa isali lona, kamahala, kuyo kaufela yabata kunwa ni kuitusizwa mezi a lona. Cwale amutokwi kubulela kuli, muli, “Kuhande, cwale Na swanela kuya feela kwa keleke ya Methodst kakuli Ni wa Methodist, kwa ancafazo. Ni ka ya ni *kwa*, kono (haiba) Ni lukela kuya kwa Pentecostal kakuli ni muancafazi wa Pentecostal.” Na mi bulelela, haiba munani sibuba saani sa Mezi awelauka, Liweluwelu lani, ha mu sweli kunwa mwale, ha ku na shutano, muka afa kuya taha kaufela. Mwa itakaleza kufa sepo ya Bupilo kuwa Katolika, wa Protestant, ku Mujuda, ku muhedeni, kamba yo kaufela ali yena, Ka niti, munani Sesiñwi kumina, se sieza zeo.

¹²³ Mulemuhe taba yeñwi kaza lona, hamu tokwi kuli cokoca. Hamu lukeli kuliyuba, ni ku lihapeleza. Ni boni zeñata ze cwalo mane za nikulisanga, kuhapeleza sika sesiñwi; kuliza lipina zeñwi, ni kutulela mwa halimu-ni-fafasi, kapa—kapa libuka zeñwi zetuna za mwa tolopo, ni liponiso zetuna, “Mutu wa hola ye.”

¹²⁴ Kunani feela Mutu alimuñwi wa hola, mi yani ki Jesu Kreste, Yali yaswana mabani, kacenu, nikuya kuile. Kunani feela Numwana alimuñwi yazwa ku Mulimu, mi yani—yani ki Jesu Kreste. Eeni, sha.

¹²⁵ Hamulukeli ku Li kasheza mwa halimu, kapa ku Li hohela mwatasi. Kapa, isiñi, hamulukeli kuikopanya ku Lona. Mu Li amuhele feela, kamahala. Amen. “Kina Sibuba sa Mezi a pila; nemu Ni siile, mwayo ipangela ili mina mingomo.” Cwale hamulukeli ku Li cokoca, ku Liyuba, ku Lihoha, ni kuikopanya ku Lona, ku Likata, hakuna nisesiñwi. Mulukela feela kunwa ku Lona, kamahala.

¹²⁶ Hamutokwi lituto zai-pangezi mutu kaufela kuba sisefiso, kamba, mwa ku kenela ku Lona, ni seo Liezize. Ha kutokwahali. Lituto za kui-pangela za likolo zeñwi ka milao, bulapeli bwa kuluka kwa kui-pangela mwahali *moo*, ni *moo*, kamba lisima leliñwi la mulao wa bulapeli; ha mu li tokwi. Ha lilukeli kuba teñi. Hamu kabeya lisila fa Teñi, Li ka li kasheza mwahalimu mwa moyo. Ha li tokwi za kueza ni lona. Lona la i-ponela! Ki Maata a Mulimu awelauka mwa Bupilo bwani. Kikabakalañi mutu ha ka toboha sika sesi Cwalo, ku ikopanya mwa mulao, sifitelela ze Ni ka bulela. Ha li tokwi lisila la ku sefisa. Ha li li tokwi. Halitokwi kuba niku- . . . halitokwi ku itinga fa pula yama sehulo fakuli litale. Lona litezi nako kaufela. Amen.

¹²⁷ Mi mutu, Ni bautwa babulela kuli, “Ni inzi feela mo ku nani mukamo kacenu.” Oh, mwai!

¹²⁸ Oh, Ni tabezi ka kupila fa Pila Mulimu, kamba lika lizamaya hande kamba a li zamai hande. Yena ki Bupilo bwaka. Amen. Yena ki Bupilo bwa luna. Ki yena Bupilo, Bupilo ka buñata. Eeni, sha. Mi—mi mutualime seo Li luezeza. Mata a lona ni kukena lifumaneha ku lona Liñi. Ha li tokwi kunwa mwa lisima kamba mulao kaufela.

¹²⁹ Yomuñwi naize, “Kihande, kadi yahao yakopano kiifi? Ha lubone haiba umu Baptist yomunde. Ni kabona haiba una ni kadi. Kapa—kapa, mu Pentecostal yo munde, haiba uwa Oneness, Twoness, Threeness, kamba—kamba seo kaufela.” Mwabona, ha Litokwi ku yubiwa mezi. Lizwela feela pili kuya. Eeni.

¹³⁰ Mwa ziba, ne Nibanga ni lona lisima le, ne Niselanga mwateñi mezi mwani ni kuyuba ni kuyuba ni kuyuba, kapa kwa pompi ye yakale, kuli nili shimbulule kuzwa mwani; mwa ziba, kusela mwateñi mezi amañwi, nikusululela teñi likokwani zeñata ni zeñwi mwahali, ku yuba likokwani zeñwi nize cwalo. Yani kona nzila feela yeo lincafazo zeñwi ze lipangiwa kayona.

¹³¹ Kono, kulumbwe Mulimu, “Kunani Sibuba sesitezi Mali, koo baeza libi ba nwela mwa teni!” Hamu tokwi kupanga ma membala ba keleke; mu panga Bakreste kuzwa kubona hase batile kwa Sibuba se.

¹³² Kikabakalañi hamu siya Sibuba sa mezi apila, kuli mu nwe kwa kasa ka ka cwalo?

¹³³ Hakuna ku acokoca; mata a lona ainzi mwa hali ku Lona. Ha li tokwi ku liyamununa, eeni, sha, kakuli (Lonaliñi) Bupilo bwa Lona bu ku Lona Liñi. Kona moo peu ya Mulimu ibezi mwa pilu ya mutu. Mi Bupilo bwa Mulimu bu ku mutu kaufela, isiñi mwa keleke. Mwahali kumina, bu ku mina, ki wena ya nani kakokwani ka Bupilo mwahali kuwena.

¹³⁴ Kutatuba feela Kwateñi kwa pili kwa koliswa kubao kaufela ba ba itutile. Mubuze muprisita wa Katolika, mubuze wa Baptist, seo kaufela alisona. Kutamuna feela kwateni kulikuñwi

kwa mezi awelauka amanca a, Na mi bulelela, kwa koliswa kuli Ki Niti. Moya wamina olapile, nihakulicwalo, kwa koliswa ku yanani linyolwa, nihakubacwalo. Cwale haiba hamu nyolelwi... Mu Baptist yomunyinyani yo, na si na linyolwa, ka kukala; kono hana tiloba ni linyolwa, mezi natilo utwahala a mande luli. Yani ki niti, kono mu lu kela kuba ni linyolwa, "linyolwa leli fuyozwi," sina Jesu mwa na li bizezile. "Muna ni mbuyoti ha mu shwa tala ni linyolwa la kuluka, kakuli mu ka kuliswa." Mi Jesu nabulezi kuli, mulikani. Eeni, sha, Ki Sibuba sesi fuyozwi kuba bashwile linyolwa.

¹³⁵ Kikabakalañi mutu haka yolisa Sibuba kwa lisa? Kikabaka lañi hane muka yolisa liweluwelu ni mezi a mwa lisa, atezí liñanya ni mawiliwili amifuta kaufela a lituto za kui-pangela, zeo Mulimu na bulezí kuli, "Kuekeza lililiñwi kwa Linzwi la Hae, kamba kuzusa iliñwi kwa Manzwi a Hae, siemba sa hae sika zusiwa mwa Buka ya Bupilo"?

¹³⁶ Mi Mulimu hana sepisize kuli Uka nyakisisa Linzwi le mwa masika kaufela, "Kakuli sepiiso ifilwe mina ni bana ba mina, ni babali kwahule, mane ba bañata be Mulena Mulimu wa luna akabiza," kikabakalañi hane mu ka kasheza babañwi mwa mulao otampakanile mwahala lilimo, ozwa kwa maana ya kale? Mwendi maana neli yende, hakuna bumaswe kuyona, mwa mazazi a Martin Luther, mwa mazazi *aa* ni mwa mazazi *ani*, ni batusi ba bañwi, hakuna sesiñwi kabona; kono yani ki manna yene wanga kale kale koo.

¹³⁷ Haiba lu lemuha mwa Bibele, kuli neba inopanga ka zazi ni zazi. Neba na ni kuyo nopanga yenca. Hasamulaho imano ba ya kale, nei bolanga. Haikoni kubola haisawifafasi. I lukela kukenwa ki likokwani, kamba sesiñwi sa—sa ku ibolisa. Lwaziba kuli ku cwalo.

¹³⁸ Mi nicwalo kona moinezi milao! Hasamulaho haiba fani kuzwa kwaancafazo yetuna kuya ku yeñwi, mi ya tampakana mane itala liñanya, iswana ni lisima lelitezi mawili-wili, sina mone luabizezanga, liñanya lelinyinyani lene litisa masila mwani.

¹³⁹ Mi bwani kona butata bobuli mwa likutwisiso zabatu ba bañata kacenu. Ba—ba tezi feela mawili-wili a shekezi, apikuluha kuzwa kuyo kuya kuyani, ni kuyo kuya kuyani, ba kandeka matangu asina Niti mwahali kuona ni hanyinyani. Yeo ki niti, acimbauka kuzwa kuyo kuya kuyani. "Ne nili wa Methodist; se Nikena kuba Baptist. Ne nili wa Katolika; se Niya kuyoba se. Ne ni iloba *sani*." Ki mihata feela ni mawili-wili.

¹⁴⁰ Oh, mulibale taba kaufela, mi amutahe kwa Sibuba (Amen!), Lisima leli welauka, fa-pila Kreste Yapila! Na lumela kuli Yena ki Liweluwelu leli sakali la Bupilo. Hamunga ku Yena ka buñata, aba a manca, mi asweli kubata, kona bunde mwa bela, mane kona mwaka bela munati. Ni bile ni Mu sebeleza cwale ka lilimo

ze mashumi amalalu kaze-taalu, mi zazi ni zazi li ba lelinde kufita leli fitile. Ha nisikabe nieza...Na bulezi kuli ha muna kushwa linyolwa haiba lunwa kwa Mezi aa. Mulemuhe butuna Mwainezi. Oh!

¹⁴¹ Isilaele nienaa naeza sina babañata kacenu, neba tobohile liweluwelu la mezi apila, ni kuyo ikatela masima abona bañi.

¹⁴² Cwale kaku ambola fa sishemo fa nako nyana, ka sishemo sa Mulimu. Luna ni milao ni li-taelo, "Mi haiba hamu likanyezwia kwa siemo se... Ni na ni kakota ka kulikanyezwa ka bulapeli; haiba hamu likani ku kona kaani, mu swanelia kueza cwalo, hamu koni kukena mwateñi," ni zeñwi cwalo. Kono Mulimu ulu pilisanga ka muhau, isiñi ka kota ya sipimiso. Mwabona? Kono Mulimu, kuambola fa muhau cwale, se mone sie zahalezi fakuli sibe teñi, kunwa kuzwa ku Yena. Kuzwa kwa kota ye ya sipimiso...

¹⁴³ Kubilaela, Isilaele wa litongoko. Hamatalime, Na ize, "Mi Nika mi potela hape." Mulemuhe mwa Mañolo. Amulemuhe, Uka balika, ili kuba potela hape. Isilaele wa litongoko, fa Nuka ye Fubelu, namemilwe kuli a Mu latelele kufita mwa mezi a Egepita asakuki, kuli babe batu baba lukuluhile. Ne bali batanga. Neba memilwe kuli babe sicaba sesi lukuluhile, ni Yena. Kutaha ka kufitela mwa Nuka ye Shwile, Nuka ye Shwile; Nuka ye Fubelu, nitaluse cwalo, kutaha kufita ku yona, ku ya mwa lihalupa, kutisa kauhano mwahala bona ni balikanyisi bene balika ku likanyisa, basina mupato.

¹⁴⁴ Oh, saani kona sene sitisize butata. Mutu ni mutu wabona nashwile mwa hali...kamba mwa—mwa hali ayona nuka, Faro ni mpi ya hae. Neba bona batu babazamaya ka Mata a moya, mi sebataha cwalo mwamulaho kakulikanyisa saani, basiyo mane nimwa mbuyoti. Mi hane baezize cwalo, se bashwa. Ki malikanyiso a butu.

¹⁴⁵ Mutu yalika kueza cwalo, halika ku likanyisa sika, fo he upanga swalisanayo butu kuya Bukreste bwa niti.

¹⁴⁶ Muzwale waka wa kwa India fa waziba saani. Mutahe kwa Bombay mi muka bona batu kwaani, ma Hindu ni babañwi cwalo, balobezi fa miutwa nifa...bazamaya fa mabotela ni—ni kuzamaya mwa mulilo, ku bonisa sebakona kueza, ni lika zeswana...Ani ki malikanyiso abutu ayo muñwi wamwa mushitu kwaani, yaeza saani ka kutahisa sitabelo kwa kalimu.

¹⁴⁷ Lufumana kuli mwahala bupilo kaufela bwabulapeli, malikanyiso abutu, mutu ulika kuba inge yomuñwi. Kuna ni feela mutala omulukela kuba sina ona, saani kikuba sina Jesu Kreste, Ya na li Linzwi. Mi cwale Linzwi la Mulimu litaha ku mina, ikaba nzila yeswana.

¹⁴⁸ Kono Mulimu naba etelezi ona cwalo kuyofita mwa naha ya sepiso, nihakulicwalo. Nebafumani, hape, mungomo kaufela, kuzwa habakala musipili mwa lihalupa mwa musipili wabona

cwale, hasamulaho wa ku kauhana, seba fumana kuli mingomo kaufela nese iomile, kubona.

¹⁴⁹ Mi mukafumana nto ye swana, muzwale, hamukala musipili wakuya kwa Naha ya sepiso. Muka fumana minyako inze ikwalilwe. Sina mukutazi yomunyinyani yaani hanaize, neeli wa Anglican, kamba yo kaufela naali yena, mi, sika sapili mwa ziba, keleke ya hae nei muhanile. Mwabona, ibile feela kuli nanani ba bañata hahulu baba amuhela Moya o Kenile, ani neli mafelelezo ateñi.

¹⁵⁰ Mi luna...mi Isilaele na fumani taba yeswana, kakuba mitala, mwa musipili wa bona kuya kwa naha ya sepiso. Mingomo nese iomile kale kaufela yona. Luli, musipili wa bona kalikute kwa Linzwi la sepiso ya Hae, musipili wabona, mwa mingomo, ne ba fumani seiomile. Mi cwale neba fumani mungomo—mingomo yene sakoni kusepiwa, mwa musipili.

¹⁵¹ Mi haiba mukaba fa musipili ka ku utwela Linzwi la Mulimu, ni kulika ku kopana ni *se* niku kopana ni *saani*, muka fumana kuli hakuna lisima mwa lifasi lelika lumelelana ni Lona. Ha ku konahali. Winzi unosi foo. Mulimu umi etelela kanzila Ya lata kumiisa kuyona. Fohe, lu fumani taba ye swana kacenu, mane mingomo kamukana se iomelezi.

¹⁵² Kono haili sepiso, ki yaniti nako kaufela, ku Mulimu Ya buluka lisepiso za Hae kwa batu ba Hae. Na sepisize kubafa lika kaufela zeo ba litokwa, kacwalo Na ezize saani. Mwahala mingomo yeomile, yeli mukungulu, mu nahane ka seo; ni Isilaele wa lipilaelo, mwa lihalaupa, mwa musipili wabona! Na bizize mutanga-wamueteleli wa Hae, mupolofita Mushe, kuzwela kwa neku leliñwi, mi akwalula liweluwelu la mezi a pila, ka Licwe lelinatilwe, kuli bana ba Hae ba balumela basike bashwa.

¹⁵³ Mwa lizazi le, leli ambola fa muhau, kuna. Ha lu swaneli. Nzila ye lueza kayona, nzila ye lupila kuyona, ha lu swaneli.

¹⁵⁴ Kono Mulimu, mwa lizazi le, sina onafa kakusasana wo, mutualime, ba Methodist, Baptist, Presbyterian, Katolika, ni kamukana, U kwaluzi Liweluwelu. Maheberu 13 yapaka se, kuli Yena ki yaswana maabani, kacenu, ni kuya kuile. Kabakaleo ki—ki buniti, Joani 3:16, “Kakuli Mulimu ulatile hahulu lifasi, mane U lifile Mwana Hae walibanda, kuli yalumela ku Yena asike ashwa, kono abe ni Bupilo bobusafeli.”

¹⁵⁵ Mi nei pahekilwe ka mabaka amabeli, kakuli batu neba tongoka ni kueza sibi, mi neba lumakilwe ki linoha mane neba shwa; mi ka swalelo ya libi zabona, ni foliso ya matuku abona.

¹⁵⁶ Mi saani ki Sibuba sesiswana sesi kwaluhezi luna kacenu, kwa piliso yaluna ni foliso yaluna, foliso ya mubili. “Kakuli Yena ki yaswana maabani, kacenu, ni kuyakuile.”

¹⁵⁷ Mi cwale Licwe laani hane linatilwe ka Linzwi la sepiso ya Mulimu, na laezi, Neli sulula mezi amande akenile; isi—isi

ainelezi, asina mawiliwili, kono ki Kuba Teñi kwa Mulimu. Mezi akenile, mi napisize kaufela bene ba nwile. Cwale luziba kuli yeo ki niti, kakuli lwa balanga kazateñi mwa Testamente ya Kale, ka kuba mufuta.

¹⁵⁸ Cwale, hamu tokwi ku ahoha, kua kasha, kukena kuona, kukena mwa mukopano kuituta mwa kuitusiseza ona. Baka mibulelela mwa kuitusiseza ona kwaani, mwabona, “Oh, kulukile, mina, haiba muamuhezi Moya o Kenile, lwa lumela cwalo, kono kacwalo mu—mu eze ka nzila *ye*.”

¹⁵⁹ Kono, mwa bona, hakuna mwa ku si kululela saani. Hamu itusisi Moya o Kenile; Moya o Kenile uitusisa mina, mwabona. Mwabona, hamu ba, hamu lukeli kuitusisa Moya o Kenile; Moya o Kenile no misweli. Mpo ha ki sika se muikungela, sina tipa, ni kushengisa potoloto ka yona. Ki kuipa ili mina ku Mulimu, niku ikambusa mina bañi kuzwa mwa nzila kuli Moya o Kenile uitusise mina.

¹⁶⁰ Mulemuhe, ne ba satokwi kuli ba acokoce kamba kuahoha, kamba nebasalukeli kuli babuze, “Cwale luitusisa cwañi mezi a?” Kakuli, neba ziba mwa ku itusiseza ona. Neba na ni linyolwa. Neba ziba sa ku eza ni ona.

¹⁶¹ Mi cwalo kimwa inezi muuna kamba musali, sikamañi, hakuna taba kuli ki wa tuto mañi kamba ki wa kopano ifi. Haiba unyolelwa Mulimu, ha lukeli kumatela kwani kwa mukopano, sina muzwale waluna yo wa Anglican sana ezize, kamba muzwale wamu British, maabani busihu, kamba kuyo kuta ni kuyo buza mwa kuezeza, kwa keleke ya Anglican, mwa lukela kusebeleseza mpo tuna ye ya nani, kubulela ka malimi, ni mwa lukela ku ezeza *se*. Ne bakona kumu lahela kwande, ka ku kala. Mwabona? Na na ni liyolelwa, konakuli Mulimu na mutalize. Kona zeliteñi ku zona zeo. Ki ku nyolelwa, mi he Yena wataleleza feela.

¹⁶² Hamu lukeli kuba ni ku sikulula, kuli mutu ami taluseze sa kueza ni ona. Mulimu wa etelelanga mutu ni mutu mwa—mwa nzila yeo Alata kuli mueze kayona. Mina muinzi mu—mu nosi, kasibili. Mu siemba sa Mulimu. Hakuna ya kona kuunga sibaka sa mina. Mi hakuna momu kona kuyela ku mutu, ni ku bulela kuli, Ni na niku “*eza se ka sona*,” kamba Ni tokwa ku “*eza saani ka sona*.” Batili, sha. Mulimu u itusisanga yona ka nzila ya—ya Bata kueza ka yona. Hamu na ni linyolwa, mu ziba kuli mutokwa mezi.

¹⁶³ Mi haiba muna ni linyolwa kakusasana wo, munwe ku Ona, kona se mu lukela kueza. Mulimu na lukisize nzila ya linyolwa la bona, bana baba nani linyolwa kuli banwe ku Yena ka mahala feela. Mi Mulimu u lukisize nzila ya muuna kaufela ni musali kakusasana wo, yana ni tala ni linyolwa. Mwendi kuna ni batu ba bainzi moo, ba basika piliswa kale. Kuna ni batu moo ba bainzi bukaufi ni ku piliswa.

¹⁶⁴ Kuna ni batu moo, ba bali moo sina mamembala ba keleke, mubata kueza ka kuluka, kono munwa mwa mungomo. Ha bana kumi bulelela Buniti boo.

¹⁶⁵ Taba feela inosi, ku taha, kikuli unge sepiso ya Mulimu mi utahe kwa Sibuba, kona kuli U kafeza linyolwa. “Yena ya ka nwa kwa Sibuba se hana kushwa linyolwa ni kamuta.”

¹⁶⁶ Mulemuhe cwale mwa—mwa Lu kululezi ba Hae—Hae ba ba amuhezi mezi a, ka sishemo, mi isi mulao kamba lisima la tuto. Wa nyakisisa Linzwi la Hae, ki mufani-wa Bupilo. Kiba bakai mwahali moo ba baziba kuli neba amuhezi Bupilo hane mungile Linzwi laani ni mezi a Hae, mi mane muziba kuli mu amuhezi Bupilo? [Puteho ili, “Amen.”—Mu.]

¹⁶⁷ Ha lu ngeni, kulukile, ka mutala, u sili feela, kamba yemibeli, mi kutuha foo Ni ka kwala fa nako nyana. Ne—Ne nilukela kuba ni kunupo yani fokuñwi. Kono amulemuhe. Ni zwela pili kubulela feela, kono ha Nitalusi kueza cwalo. Amatalime, halu ngeni ka mutala, batu ba babeli feela.

¹⁶⁸ Alu ngeni musali fa lisima la Jakobo, lisima lene likatilwe. Ki yani uinzi fani. Kona seo musali na ziba, neli sona siliba se kwa na kelanga mezi. Mi fani fa lisima sa a fumana, mwa siswaniso fa hule nyana fani, abona Muuna yainzi fani, ili Mujuda. Mi yena na li Musamaria, mwa munzi wa Sikare. Mi lu fumana kuli Muuna yo, Mujuda yo, na bulezi Linzwi lelinca ku musali yo, ali, “Aku Ni fe kwa mezi ni nwe.”

¹⁶⁹ Sa bulela cwale kuli, “Luna ni miseto. Haki—haki swanelo kuli Wena uni buze puzo ye cwalo; Wena ka kuba Mujuda, mi na nili Musamaria.”

¹⁷⁰ Yena ali, “Kono kambe wa ziba Ya sweli kubulela ni wena, neuka Ni kupa mezi, mi ne Ni ka kufa mezi kuli usike wa tahanga kwa lisima le ku tonwa; akaba mezi abuba awelauka ku wena.” Mulemuhe ha na tiloziba kuli ki Niti!

¹⁷¹ Cwale, pili, mutu kaufela nakona ku bulela cwalo. Kono yena ali, “Mina muli mulapela mwa Jerusalema, kono luna lu lapelela mwa lilundu le.”

¹⁷² Yena ali, “Kupiliswa ki kwa ma Juda. Lwa ziba seo lu lumela. Kono,” ali, “Ni bata kuku bulelela nto iliñwi,” mwa manzwi aswana sina cwana, “haki mwa lilundu leo, kamba kwa Jerusalema. Nako yataha foo batu baka lapela Mulimu ka Moya ni ka Niti, kakuli Ndate ubata baba cwalo.” Se ali, “Zamaya uyo biza muuna hao mi mutahe kwanu.” Mutualime, fa na nyakisizwe. Faa kona foku bonahalela liweluwelu fana inzi. Ali, “Zamaya uyobiza muuna hao mi mutahe kwanu.”

Yena ali, “Hanina muuna niyo mukana.”

¹⁷³ Yena ali, “U bulezi niti.” Mwabona, neku bonahalile inge kuli neli shutano yazeo Namubuza, mi ali, “Zamaya uyobiza muuna hao.”

Ali, “Hanina muuna.”

¹⁷⁴ Ali, “U bulezi niti.” Ali, “Kakuli ubile ni ba ketalizoho, mane ni yopila niyena cwale haki muuna hao.”

¹⁷⁵ Mutualime musali yani, ka mo neba shutaneli ni baprisita ba zazi laani! Baprista ba zazi laani neba boni taba yeswana yani inge iezahala, mi bali, “Yani ki diabulosi, kiza kuikupulela, kamba—kamba Beuzebube.” Mwabona, neba palezwi kubona Linzwi halisepisa sani.

¹⁷⁶ Kono musali yomunyinyani yani nayemi hande ka Mañolo kufita muprisita kaufela. Na ize, “Muñaka, Ni bona kuli U mupolofita. Ha lu sikaba niya cwana ka lilimo ze mianda ye mine, kuzwa ku Malaki. Kono,” ali, “nelu libelela ya cwalo, mi luziba kunani Alimuñwi ya cwalo yataha, yena Mesiah. Mi hase Atile, se kona sa Ka eza.”

Jesu ali, “Kina Yena.” Amen.

¹⁷⁷ Kana mu lemuhe, natilo siya buleke bwa hae fa lisima la Jakobo, ku matela mwa munzi; atezi sibuba sesi shelauka! Na liboni handende hali taluswa, mi Yena nali Sibuba sani sa Bupilo. Ni bata kumi zibisa yena. Na siile zani; Hana tilo lemuhiwa kuli ki Linzwi la Bupilo. Sa i siya; mi ato lemuha kuli Licwe leliswana laani, lene linatilwe mwa lihalaupa, neli bonahalile kuba teñi faani.

¹⁷⁸ Ni ambole cwana, yani Mulimu ya swana yanali mwa mazazi a felile, yelu ambolanga hahulu ka yena, U teñi mo ona fa; isiñi ka kutwisiso ya lituto za bumulimu, kono ka zibo ya butu ya ku nyakisisa kwa Hae kuli Uka sulula mwa mazazi amafelelezo a, Moya o Kenile fahalimu a keleke ya Hae. Yena haki “Nenili teñi.” U sali onacwalo “YALITENI,” pulelo yacwale, nako kaufela.

¹⁷⁹ Kona kuli lisima neli tokwile munati wa lona. Mi kucwalo ni ku mutu yawela mwa maata a Mulimu, ka kolobezo ya Moya o Kenile, milao ya likopano ifevelwanga ki bunde bwa yona. Hamu tokwi hape nise sikana sa limbotwe zeinelezi zaani, ni mikolozwani, ni liñanya, ni zeñwi cwalo. Mu nwa mwa Sibuba se sincia mi kisesi kenile, ili Linzwi la Mulimu, ki lelinca hola ni hola mwa moyo wa mina. Ki taba yeswana ni cwanoñu, Linzwi hali lemuhilwe kuli ki la Niti, haku tatube mi ubone haiba ki buhata.

¹⁸⁰ Ni haikaba kuli lisima libulukile mezi alona, li inisize nako ya lona hande; kono, mwa bona, Sibuba sa Bupilo nesi liteñi, haki lisima la Jakobo ni hanyinyani, ka kunwa kwa moyo. Seo neba hupula, hane ba kanwa mwa lisima laani, kupalañi, neku ka ba hande; kono cwale Sibuba sa Bupilo Sona luli nesili teñi.

¹⁸¹ Cwale ha lutokwi milao ni likopano ze ne lunani. Lu kwa maungulo a nako. Mi Mulimu nasepisize, mwa nako ye ya mafelelezo, lika zeo za Naka eza. Mi lwalibona hali talelezwa, mwa Linzwi. Lu utwa kuli musole wa ndwa wakona, kuyema, inze anjanja, mi uli, ba, “Kuna ni se sika ezahala.” Lu utwa Moya

o Kenile unze ulu lemusa kuli kuna ni sesika ezahala. Lu bona lika kamukana linze li iketile hande. Fohe, akusiye mulao wo mi utahe kwa Sibuba. Eeni, sha.

¹⁸² Sibelekile musebezi wasona, kono cwale na talimana pata ni pata ni Sibuba Kasibili.

¹⁸³ Mwa Joani 7:37-38, Jesu naize mwa mazazi amaungulo amukiti wa tabenakele (Na bulez si kamañi?), “Haiba kunani ya shwile linyolwa, a tahe ku Na, mi anwe.” Ona mwa hali a baitutu! “Haiba kuna ni yashwile linyolwa, a tahe ku Na, mi anwe. Kakuli Mañolo kona saabulezi haali, kuzwa mwahali a hae ku ka buba Mezi a pila.”

¹⁸⁴ Kuna ni Sibuba sesipila. Saani kona Sibuba seo batu bahanile kacenu. Kabakala lituto, ba hanile Sibuba sa Mezi a pila. Nibata kumi zibahaza ku Yena. Yena, ku na... Mi cwale Na kwala.

¹⁸⁵ Yena, ku na, ki sona Sibuba saani sene sipilisize bupilo bwa Hagare, ni mwana, hane ba shwa mwa lihalaupa.

¹⁸⁶ Na lumela Yena ki Licwe laani, mwa Isaya 32, Yena ki yena Licwe mwa sibaka sa manyando. Ki masabelo mwa nako ya liñungwa.

¹⁸⁷ Zakaria 13, Yena kiyena Sibuba sani sesi kwaluhile mwa Ndu ya Davida, sa sibi. Ni lumela kuli Yena ucwalo. Mina bo? [Puteho ili, “Amen.”—Mu.]

¹⁸⁸ Mwa Lisamu 36:9, Yena ki sibuba sa Bupilo bwa Davida. Yena kiyena Mezi akuzize a Davida, ni mafulisezo a mata. Kiyena Mezi afumaneha mwa kasa, ka Davida.

¹⁸⁹ Mwa Genese 17, Yena ki lizwele la Abrahama, El Shaddai. Kono bupilo bwa hae hane buzwile kuyena, nihakuli cwalo u... Mulimu naize.

¹⁹⁰ “Muuna wa lilimo ze mianda za kupepwa, taba ye ika konahala cwañi? Seni hulile, musalaka ucembalile, lika ze lika konahala cwani?”

¹⁹¹ Yena ali, “Ki na El Shaddai.” Cwale, *El* ki “wa,” mi—mi *Shaddai* ki “lizwele,” cwale Shaddai ki mwa buñata, kutalusa kuli “Kina Mulimu wa mazwele.”

¹⁹² Sina mbututu ya kula azielehile, ni mata a hae amu felezi, alobezi fa sifuba sa mahe ni ku anya mata a hae kumu kutela. Luli. Isiñi feela... Ha sweli ku anya, haa sakula hape. Winzi kwa lizwele la mahe, wakula inza sweli kuba ni maata.

¹⁹³ Mi mutu kaufela ya kanga sepiso ya Mulimu mwa pilu ya hae, saani, “Sepiso ifilwe mina, ni bana bamina, bao babali kwahule, mane ba bañata be Mulena Mulimu wa luna akabiza,” ni kuyema ona faale munze muanya maata amina. Mwanana ya kula, ulumele seo! Ki sa balumeli.

¹⁹⁴ Toko ya mu lumeli, Na kona kuhupula lipina zeñata zeo baopeli ba lufile. Kunani aliñwi wa bona naize ka nako yeñwi, Yena . . .

Kuna ni Siliba se sitezi Mali,
Azwa mwa misinga ya Emanuele,
Baeza libi ba nwela mwateni,
Batapiswa libi zabona kaufela.

Lisholi hana shwa atabela habona
Sibuba Saani mwa zazi la hae;
Ni Na cwalo, ni hani muswana,
Ni tapiswa libi zaka kaufela.

Mi cwale katumelo ne Niboni nuka yani
Yebuba kuzwa kwa miupa yahao,
Lilato leli pilisa libile pina,
Mi ikaba cwalo kufitel Ni shwa.

¹⁹⁵ Ku na, ki Yena Mezi a Linzwi la Kauhano, ao ami kauhanya kuzwa kwa lika kaufela ze lwanisa Linzwi la Hae. Saani kona Sibuba se Ni Mulumela kuli ucwalo. Eeni, sha. Ani, Ki Mezi ani kauhanyize kuzwa kwa masima akui-katela, kuni isa kwa Sibuba sa Mezi apila. Oh, mulikani, Na kona feela . . . Mwa kona feela kuzwela pili cwalo, mwa lika zeo—zeo Ali zona ku luna! Ki yena Alpha, Omega. Kiyena Makalelo, Ki yena Mafelelezo. Yena Kiyena ya naliteni, ya teni, niya kataha. Ki yena Mubisi wa Lusika lwa Davida. Ki yena Naleli ya Kakusasana. Ki yena lika Kaufela ku na.

¹⁹⁶ Mi, muzwale, kezeli, haiba hau sikabe u—u . . . U sweli kunwa feela mwa lisima le la kui-katela la mutu, bupilo bwa hao kaufela, kiñi kakusasani cwana hausa sii lisima lani mi utahe kwa Sibuba se?

¹⁹⁷ Ha lu inamiseni litoho za luna fa nako nyana. Hamunze mu inami cwalo . . . [Kezeli ukala kuopela ka lulimi loluñwi. Hakuna manzwi fa tepu. Yomuñwi ukala ku toloka—Mu.] . . . ka zibo yaka, kubiza batu kwa kulapelelwa. Kibabakai cwale?

¹⁹⁸ Ne—Ne nibilaela luli, Ne—Ne ni mibuluka nako yetelete hahulu, sitisize kuli ni pumakele kutazo yaka mwa liemba. Kono Ni lumela kuli Moya o Kenile ubata kuli mu utwisise ze Ni talusa. Amubone, hakuna sika sesi butokwa mwa lizazi le kufita kuba yalukile ku Mulimu; mwabona, lico zaluna, kamba ki likamañi, sika kaufela. Mi Mulena uteni faa. Cwale, Ni utwile seo hañwi feela mwa bupilo bwaka, konji nako ye.

¹⁹⁹ Cwale luka . . . kaufela mina mo, isiñi “kiba bakai.” Kaufela mina mo baba bata kunwa ku Ona, amuyeme feela fa muzuzu, halunze lu lapela. Mulimu ami fuyole. Mi Mulena ami fuyole.

²⁰⁰ Cwale kibababakai babali moo, ba—ba ba yemi ona fa cwana, baba bulela kuli, kaku nanula mazoho sina *cwana*, “Mulimu, haku tahe kuna, unitaze feela, ni tuhele ninwe mwa

Sibuba se. Mi ha Ni sika eza sesilukile, kono Ni—Ni bata kuli U niswalele ka bakeñisa zona. Nibata kuli Utapise sibi saka. Mi u—u—u nilumeleze, ku zwa kacenu, feela . . .”? Hamutalime feela! Mwai!

Kuna ni Siliba se sitezi Mali,
 Azwa mwa misinga ya Emanuele,
 Baeza libi ba nwela mwateni,
 Batapiswa libi zabona kaufela.
 Batapiswa libi zabona kaufela,
 Batapiswa libi zabona kaufela;
 Baeza libi ba nwela mwateni,
 Batapiswa libi zabona kaufela.

²⁰¹ Cwale saani, wena mulumeli wa Mukreste, wa muhezi Kreste kuba Mupulusi wa hao, kono ausi kaba kale . . . Cwale haiba ha usikabe kale, saani kona Sibuba. Seo Sinosi feela Ni ziba ki sani Sibuba sesizwa mwa misinga ya Emanuele. Cwale, mi haiba buñata bwa mina mo . . .

²⁰² Kinto yeswana feela sina hane Ni ambola busihu bobuñwi kaza kambande kakanyinyani kene ka zamaya mwatasi asishete amoho ni likuhu. Mi neka sikabe kaziba sesiñwi kaza likuhu, kono neka ziba kuli neku nani sesiñwi kukona sesi shutana kuzwa kwa likuhu. Mi maa kona ana tilo kabata, nasweli kulila ali mwa halimu. Neli pizo ya mbande. Mwabona, ne ka lukela kuba mbande, ka ku kala, hakusi cwalo na sike alemuha pizo yani. Mwabona, yena . . .

²⁰³ Kulukela ku ba sesiñwi mwani, sesikona kumela, hakusi cwalo hasikoni ku tahisa Bupilo. Mi haiba Peu, lona Linzwi la Mulimu, halinzi ku mina, Moya o Kenile uteni fa cwale kuli umelise sani ni ku Si tisa kuba buniti ku mina.

²⁰⁴ Kibabakai mwahali mo ba basika amuhela kolobezo ya Moya o Kenile, mu nanule mazoho amina sha? Kaufela mwahali, kainikai, luli ka kusepahala, haiba amu sika amuhela kale Moya o Kenile, mi mutabela ku uamuhela, mu nanule lizoho la mina. Fo muinzi kaufela, mu yemise lizoho la mina ona cwalo, fanako nyana.

²⁰⁵ Cwale Ni bata kuli, mina baba yemi inge muba talimela, Ni bata kuli yomuñwi abeye mazoho fahalimu abona.

²⁰⁶ Na lumela onafa cwale kuli Moya o Kenile ukatala mañi ni mañi wa mina ya Ubata. Cwale musike mwa hopula lico kwande kwani zeinzi mwa liapehelo. Ha lu nahaneñi ka Sico se fa. Se ki Sona. Bo ki Bupilo. Mwabona, bo ki Bupilo.

²⁰⁷ Cwale a mu sikuluhe, mañi ni mañi wamina, mi mu beye mazoho kuyo muñwi. “Mi ba beya mazoho fahalimu abona!” Cwale Ni bata kuli mu lapelele mutu yemu beile lizoho yo . . .

²⁰⁸ Cwale musike mwa hopula kaza kuzwa fande. Musike mwa hopula sika sesiñwi kaufela. Muhupule feela, onafa cwale, ona

Moya o Kenile uteni mo kuli uwele ku mutu kaufela. Mu kwalule lipilu za mina, mu yube mezi a masima kaufela azwe, mi mubulele muli, “O Sibuba sa Bupilo, taha ukene kuna. Uni taze, O Mulena Mulimu, ka bunde ni sishemo sa Hao.”

²⁰⁹ Mulena Jesu, Sibuba saani sesisa katali! Na lapela, Mulimu, kuli U ka taza mañi ni mañi wa bona. Cwale Moya o Kenile hausuluhe fa cwale. Na lapela, Mulimu, kuli lulibale kaufela ka zeñwi ze siezi; kuli Moya o Kenile uwele mwa hali aluna, onafa cwale, mi uka lufa kwa Mezi a Bupilo, mahala feela, kwa libaka kaufela. Ueze cwalo, O Mulimu. Halunze lu—lu zwelapili mwa tapelo ni pina, luswalisane hamoho, Mulena, kuziba kuli Pata ya Hao, Kuba teni kwa Hao kwa Bumulimu, lubata ku taha kwa Siliba. Lu bata luli, kolobezo ya niti ya Moya o Kenile. Mulena, batu ba ba lapelela Sani. Ni lapela kuli, kayona nako ye fa, kuli bakatazwa ka bunde bo bwa Mulimu. Ueze cwalo, O Mulimu. U utwe tapelo ya bana ba Hao. Ha Kutahe fa halimu abona, lumeleza Maata a Mulimu, ni Moya o Kenile, uba apese. Ueze cwalo, Mulimu.

²¹⁰ O kamo luitumelela ku Wena ka ancafazo, ba keñisa Pata ya Mulimu ya maata wa Lihalimu, inze ayemi mwahali aluna! Ona mwa hola ya musihali wo, Mulena, u lufepe! Mulena, lubata Lico fa tafule ya Hao. U lufepe, Mulena, onafa cwale. Lufepe ka Moya o Kenile, mwa bupilo bwa luna. Mioya ya luna ina nitala mi inyolezwi. Sina hane Wize mwa kutoloka kwa pina, “Lika sululela mezi fa mubu wo omile.” Haku ezahale cwalo, Mulena. Lumeleza kuli Manzwi a Hao azibahale mwa lipilu za bana ba Hao, “Mezi fa halimu, amubu wo omile.” Mulimu wa Kamita, haku utwe tapelo ya batanga ba Hao, mi ulufe Mbuyoti yani. Amen.

Oh, mo Ni latela Je- . . .

²¹¹ Amu zwele feela pili ku Mu lumbeka cwale. Hamu batisse, Moya o Kenile kiwo fa. Haiba amu U amuheli, ki mulatu wa mina.

Moni latela Jesu,

“Wa Ni lata kana kufita bao?”

. . . nilata Jesu,

Kakuli U ni latile pili.

Oh, mo Ni latela . . . (Tumbo ifiwe ku Mulimu!)

Oh, mo Ni latela . . . (Ku cwani he haiba ataha
nako yona ye A . . . ? . . . -tulo?)

Oh, mo Ni latela Jesu,
Kakuli U nilatile pili.

Ha nina ku Mu hana,
Ha nina ku Mu hana,
Ha nina ku Mu hana,
Kakuli U nilatile pili.

Yomunde, yomunde, Jesu u kuna,
 Muelezi, Mulena wa Kozo, Kiyena Mulimu ya
 Mata;
 Oh, atoni pulusa, kuni buluka kuzwa kwa sibi
 ni maswabi,
 Yomunde Muliululi waka, kulumbwe Ye . . .

²¹² Ha lu iopeleleni ku Yena cwale!

Yomunde, yomunde, Jesu u kuna,
 Muelezi, Mulena wa Kozo, Kiyena Mulimu ya
 Mata;
 Oh, atoni pulusa, kuni buluka kuzwa kwa sibi
 ni maswabi,
 Yomunde Muliululi waka, kulumbwe Libizo la
 Hae!

²¹³ Baba ikutwa cwalo kaufela, muli “amen.” [Puteho ili, “Amen.”—Mu.] Oh, hallelujah! Ni bona batu ba bañwi ba taha mo cwale, ka Moya o Kenile.

Ne ni latehile, cwale Ni fumanwi, ni lukuluhile
 kuzwa mwa katulo,
 Jesu ufa tukuluho ni piliso yetezi;
 Hato nipilisa, kuni zusa kwa sibi ni maswabi,
 Yomunde Muliululi waka, kulumbwe . . .

Halu nanulenii mazoho aluna cwale mi luli lulum- . . .

Oh, yomunde, yomunde, Jesu u kuna,
 Muelezi, Mulena wa Kozo, Ki yena Mulimu ya
 Mata;
 Oh, kuni pilisa, kuni buluka kuzwa kwa sibi ni
 maswabi,
 Yomunde Muliululi waka, kulumbwe Libizo la
 Hae.

²¹⁴ Kana mwa Mu lata? [Puteho ili, “Amen!”—Mu.] Oh, yomunde! Milumbeko ifiwe kwa Sibuba saani sesitezi Mali, ko baeza libi ba tamuluha kuzwa kwa sabo kaufela ya mutu, likatulo kaufela, ba lukuluhile feela ku Yena. Hallelujah! Oh, mwai, saani luli kissesinde!

²¹⁵ Cwale hanze lu iopela yani hape, kifo kaufela ba Methodist, Baptist, Katolika, Presbyterian, seo ki, halunze luopela cwana, “Yomunde, Jesu u kuna,” ha lu sikuluheni feela ni ku itumelisa mañi ni mañi, ni kuba feela ni kuko-pana kokunde kwa kale. Mwa ziba, Na, kona se Ni tabela. Amu tahe, halu iopeleni cwale halunze lueza cwalo.

Oh, yomunde, yomunde, Jesu u kuna,

²¹⁶ [Muzwale Demos Shakarian uambola ni muzwale Branham, “Muzwale Branham, Ni utwile manzwi azwa ku Mutomphehi Johnson, kuli u matiselizwe kwa sipatela ka butuku bwa pilu, mi lulukela kumu lapelela niku lapelela na ha yaluna.” Mizwale

ba ambola fateni. Yomuñwi uli, “Halu libeleleni nyana fa muzuzu.”—Mu.]

Yomunde, Jesu ki (yeo kiniti)
Oh, Muelezi, Mulena wa Kozo,

²¹⁷ [Muzwale Shakarian hape ubulela ni Muzwale Branham, “Uni swalele, uni swalele hape, kana ubata ku tuluka fa muzuzu feela?” Muzwale Earl Prickett uetelela puteho mwa pina, *Yomunde*. Hakuna manzwi fa tepu. Puteho iopela *Kuna Ni Nuka Ya Bupilo*. Hakuna manzwi hape fa tepu—Mu.]

Bibele ii ze, “Mu lapelele baba sweli ku mi busa.”

²¹⁸ Ndata luna Yakwa Lihalimu, luyemi mwahala kutokwa kokutuna bakeñisa mueteleli wa naha ya luna, yena Mutompehi. Mane ha kulata hazibi se, Mulena, kono Wena wa ziba. Ni lapelela Muzwale Johnson, sina haipulela kuli u lumezi ku Wena. Mi, Ndate, butuku bwa pilu, lwa utwisisa, bu musweli. Na lapela, Mulimu, ubanduse bupilo bwa hae. Lu mwa—mwa butata bwa naha onafa cwale, nihakuli cwalo. Mi lukulula Moya wa Hao kuli utahe ku yena, Mulena. Mi ka nako ya cwale, mwa sipayela kamba kaufela kwa kona kuba, aku lukulule Moya wa Hao kuli uye kuyena kwani ili mwa Sipatela sa Walter Reed mi uswale mubili wa hae, ubanduse bupilo bwa hae. Mulena, mutu yaani u mwatasa ñalelwa, ziezi ye tuna kufita molu nahanelia. Kacwalo lwa lapela, Mulimu, sina balumeli ni kakuba siemba sa naha ye, lulapelela mueteleli wa luna, kuli Umu ekeleze kwa bupilo, mwa hola yetuna ye, ka Libizo la Jesu Kreste. Amen.



MASIMA ATIBUKILE LOZ65-0123
(Broken Cisterns)

Liñusa le ka Muzwale William Marrion Branham, neli katalizwe lwa pili mwa Sikuwa la Pelekelo kakusasana, Sope 23, 1965, Kiba Evangel Yetezi Ya Baana Ba Pisinisi fa mukushuk kwa Ramada Inn mwa Phoenix, Arizona, U.S.A., iingilwe kuzwa fa tepu ya magesi ya manzwi ni ku hatisiwa kusina kuzusa sika mwa teni kuya Sikuwa. Toloko ye ya mwa Silozi nei hatisizwe ni ku hasanyiwa kiba Voice Of God Recordings.

LOZI

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org